


宋書

122
30
3

內閣文庫
五九
三〇
宋書

內閣文庫
番號 5946
冊數 30 1
函號 280 29


280-29



館書圖京東			
三〇	九七	四	正史類
冊	號	架	函

漢書門			
三〇	九七	四	五九四六
冊	架	函	號

正史五十九



重校宋書跋

淺草文庫

曹在李

有宋運乘金行之缺歷符璧占之數德誠
謝於隆代事亦雄於季朝顧自史推南北
淪彼常嗜入置宋魏鮮其專學譬之會流
泉壑涇渭之源莫討委柢寒原枳橘之形
旋質遂令魚虎竄茲蟲鳥此馮公重為表
章而士奔幸叨叅檢者也然夏五之書尚
存曩載已三之誤寧易斯簡惟是八志上

日占同

大德



該乎諸家列傳旁通乎別史雖均測海良
等他山故補亡則時見珠還仍疑則不無
瑜掩或辨竒於有尾總訂文于飾足固踰
改木之勤諒侷落葉之諺若乃張暢之事
兩見彥之之傳獨之山居剝蝕自敘剝斷
則敢遵宣父猶及之旨庶俟瞻聞刪定之
助耳萬曆丁酉重九日海鹽姚士舜謹跋

重校宋書跋

休文宋書畢工三年矣余初閱數篇猶有
錯誤會友人布衣姚叔祥自樵李見訪叔
祥故博雅即以委之乃手對舊本參以南
北史通典通志等諸書摺摺三月始得竣
事凡補舊闕七十字增一百九十餘字正
一千一百餘字餘點畫差訛而改正者約
數千字已余又從叔祥所更定處覆加校

勘而所為是正者尚多有之以此信校讐之難古人諭之掃塵愈掃愈有果然然宋書至是亦可以稱善本矣姚君名士彝叔祥其字海鹽人

萬曆丁酉冬至前齋宿日馮夢禎跋



南雍新雕宋書引

按梁書約傳約所著宋書外有晉書百一十卷齊紀廿卷高祖紀十四卷俱不傳獨宋書百卷存耳夫宋祖起布衣糾合義徒殲滅桓玄再立朝廷威加關洛終移鼎祚漢以來足稱雄主然牽于內志奔關中資赫連氏終

宋之世不能洗長河以北之腥羶自
但大業可歎也約之先田子林子以
下世為宋臣武功文藻家聲爛然故
其撰次宋事最為詳贍然約之前何
蘇山徐諸君子俱有述作惟缺永光
至禪讓十餘年事非約之才不能刪
其蕪穢補其脫略著為一代實錄姚

察稱約高才博洽名亞遷董誠然夫
約以齊臣扳附興運妄希台司至于
憂瘠竄後赤章之事尤為可嘆其人
品不足多也至其史才則當與陳壽
范曄鴈行而嚴父遷固其書自能炳
烺天地間豈可少哉宋書海內惟有
南監舊板而剋脫模糊者十之七不

便印摹余與陸敬承在事奮欲新之
而不逮賴少司成中原季君始獲舉
其功自夏迄秋不半歲而畢以余與
敬承有故讐以尹之勤仍得附名卷
首又索余一言引之使不才姓名得
托此書耀于來祀亦幸矣哉引之日
為

萬曆二十二年十月壬子奉訓大夫
右春坊右諭德掌南京翰林院事前
司業秀水馮夢禎書于公署之愚竹
居



重刻宋書引

宋書蓋梁沈約為之約先為齊之散
騎常侍而後附梁禪代之舉約實謀
府則於梁為傾心佐命之忠於齊為
逋主孤恩之逆卒有和帝劍斷其舌
之夢亦其慙負故國一念雖寤寐有
不自安者使然而遂惶惑為赤章事

神愈亂而動愈不經矣余薄其為人
不取獨其高才博洽則誠如姚察所
稱遷董之亞蓋約亦有言文章當從
三易易見事易識字易誦余嘗嘆服
此說以為信今傳後之文尤當從三
易今讀其所著宋書信然雖存一代
實錄可也監本刻於弘治之初歲久

散軼固無怪乃其存者亦多譌而文
字離於古抑又堙滅幾不可辯識儒
者或失傳而一代之史恐遂以廢司
成陸馮兩先生惟其廢之為拳拳也
於是乎有重刻之役蓋役未竣而兩
先生後先相繼遷矣則遂猥以錄錄
踵校讎之末而竣事於余余固所謂

因人成事者也然亦幸不辱命於兩
先生云嗟乎余觀宋氏八主六十年
間安枕之日不二三稱兵之日常
九可謂一代艱難之運而當世君臣
得失之林亦少概見是書是術而鏡
也故不具論論其可為永鑒者國
家難起於自作親如父子手刃相圖

此誠天地未有之變至今使人不可
為心而後世宮闈階袖之端猶往往
蹈此而不寤寤亦且晚則不睹夫宋
之覆轍而未嘗索鑒於史以自照也
夫史千古好醜興亡之鑒非諸書
家之書倫也故諸子百家之書或可
廢而史獨不可廢諸子百家之書廢

第廢詞人效曠學步之資而史廢廢
千古好醜興亡之鑒矣夫好醜興亡
之鑒廢是蒙衆人之目而終夜處於
暗室之中跬步且無從睹見而又安
所辯其吉凶去從之塗哉故曰諸子
百家之書或可廢而史獨不可廢此
兩先生所以重刻宋書意也蓋曰一
代之史存而千古之鑒庶其恒懸而
不廢也夫

萬曆甲午冬十月朔

南京國子監司業宛丘李道統題於
署之寒碧亭



皇明南京國子監祭酒陸可教

司業馮夢禎

司業季道統

校閱

監丞詹仰聖

博士魯光魯

林國光

張令聞

助教張鳳翼

何詩

萬曆二十一年刊

宋書

張應慶

陶唐臣

學正戴尚志

徐昌會

鄭俶

夏思

學錄王九秋

應恩

典簿朱廷傑

典籍劉邦重 同校

校對監生

鄧希稷

葉憲祖

張汝霖

汪有功

劉世教

秦延默

張元憬

袁時輔

邵有見

潘雲章

史稽古

黃瀾

彭謨

汪應錄

汪以微 彭學沂

徐國彥 李繼元

陳、蔣 陳以儼

易應斗 王尚哲

許有宙 張光祚

徐學顏 劉永豐

宋書目錄

凡一百卷

本紀十卷

志三十卷

傳六十卷

紀第一

宋書一

武帝上

紀第二

宋書二

武帝中

萬曆三十二年刊

宋書目錄

紀第三 宋書三

武帝下

紀第四 宋書四

少帝

紀第五 宋書五

文帝

紀第六 宋書六

孝武帝

紀第七 宋書七

前廢帝

紀第八 宋書八

明帝

紀第九 宋書九

○後廢帝

紀第十 宋書十

順帝

志第一 宋書十一

○志序

志第二

宋書十二

曆上

志第三

宋書十三

曆下

志第四

宋書十四

禮一

志第五

宋書十五

禮二

志第六

宋書十六

禮三

志第七

宋書十七

禮四

志第八

宋書十八

禮五

志第九

宋書十九

樂一

志第十

宋書二十

樂二

志第十一

宋書二十一

○樂三

志第十二

宋書二十二

○樂四

志第十三

宋書二十三

○天文一

志第十四

宋書二十四

○天文二

志第十五

宋書二十五

○天文三

志第十六

宋書二十六

○天文四

志第十七

宋書二十七

符瑞上

志第十八

宋書二十八

符瑞中

志第十九

宋書二十九

符瑞下

志第二十 宋書三十

○五行一

志第二十一 宋書三十一

○五行二

志第二十二 宋書三十二

○五行三

志第二十三 宋書三十三

○五行四

志第二十四 宋書三十四

○五行五

志第二十五 宋書三十五

州郡一

揚州 南徐州

南兖州 兖州

志第二十六 宋書三十六

州郡二

南豫州 豫州

江州 青州

冀州

司州

志第二十七

宋書三十七

州郡三

荊州

郢州

湘州

雍州

梁州

秦州

志第二十八

宋書三十八

州郡四

益州

寧州

廣州

交州

越州

志第二十九

宋書三十九

百官上

志第三十

宋書四十

百官下

傳第一

宋書四十一

后妃

孝穆趙皇后

孝懿蕭皇后

武敬臧皇后 武張夫人

少帝司馬皇后 文元袁皇后 潘淑妃

文路淑媛 孝武文穆王皇后 宣貴妃

前廢帝何皇后 文沈婕妤

明恭王皇后

後廢帝江皇后

順陳太妃 順謝皇后

傳第二 宋書四十二

劉穆之 王弘

傳第三 宋書四十三

徐羨之 傅亮

檀道濟

傳第四 宋書四十四

謝晦

傳第五 宋書四十五

王鎮惡 檀韶

向靖 劉懷慎

劉粹

傳第六

宋書四十六

趙倫之

到彥之

闕

王懿

張劭

傳第七

宋書四十七

劉懷肅

孟懷玉

弟龍友

劉敬宣

檀祗

傳第八

宋書四十八

朱齡石

弟超石

毛脩之

傳弘之

傳第九

宋書四十九

孫處

蒯恩

劉鍾

虞丘進

傳第十

宋書五十

胡藩

劉康祖

垣護之

張興祖

傳第十一

宋書五十一

宗室

長沙景王道憐

臨川烈武王道規

鮑照

營浦侯遵考

從子季連

傳第十二

宋書五十二

庾悅

王誕

謝景仁

弟述

袁湛

弟豹

褚叔度

傳第十三

宋書五十三

張茂度

子永

庾登之

弟炳之

謝方明

江夷

傳第十四

宋書五十四

孔季恭

羊玄保

沈曇慶

傳第十五

宋書五十五

臧燾

徐廣

傅隆

傳第十六

宋書五十六

謝瞻

孔琳之

傳第十七

宋書五十七

蔡廓 子興宗

傳第十八 宋書五十八

王惠 謝弘微

王球

傳第十九 宋書五十九

殷淳 子孚弟冲 張暘

何偃 江智淵

傳第二十 宋書六十

范泰 王淮之

王韶之 荀伯子

傳第二十一 宋書六十一

武三王

廬陵孝獻王義真

江夏文獻王義恭

衡陽文王義季

傳第二十二 宋書六十二

羊欣 張敷

王微

傳第二十三

宋書六十三

王華

王曇首

殷景仁

沈演之

傳第二十四

宋書六十四

鄭鮮之

裴松之

何承天

傳第二十五

宋書六十五

吉翰

劉道產

杜驥

申恬

傳第二十六

宋書六十六

王敬弘

何尚之

傳第二十七

宋書六十七

謝靈運

傳第二十八

宋書六十八

武二王

彭城王義康

南郡王義宣

傳第二十九

宋書六十九

劉湛

范曄

傳第三十

宋書七十

袁淑

傳第三十一

宋書七十一

徐湛之

江湛

王僧綽

傳第三十二

宋書七十二

文九王

南平穆王鑠

建平宣簡王宏

晉熙王昶

始安王休仁

晉平刺王休祐

鄱陽哀王休業

臨慶冲王休倩

新野懷王夷父

巴陵哀王休若

傳第三十三

宋書七十三

顏延之

傳第三十四

宋書七十四

臧質

魯爽

沈攸之

傳第三十五

宋書七十五

王僧達

顏竣

傳第三十六

宋書七十六

朱脩之

宗慤

王玄謨

傳第三十七

宋書七十七

柳元景

顏師伯

沈慶之

傳第三十八

宋書七十八

蕭思話

劉延孫

傳第三十九

宋書七十九

文五王

竟陵王誕

廬江王禕

武昌王渾

海陵王休茂

桂陽王休範

傳第四十

宋書八十

孝武十四王

豫章王子尚

晉安王子勛

松滋侯子房

臨海王子頊

始平孝敬王子了繼而永嘉王子仁

始安王子真 邵陵王子元

淮南王子孟 晉陵孝王子雲

南海太子師 淮陽思王子霄

東平王子嗣 武陵王贊

傳第四十一 宋書八十一

劉秀之 顧琛

顧覲之

傳第四十二 宋書八十二

周朗 沈懷文

傳第四十三 宋書八十三

宗越 吳喜

黃回

傳第四十四 宋書八十四

鄧琬 袁顥

孔覲

傳第四十五 宋書八十五

謝莊 王景文

傳第四十六

宋書八十六

殷孝祖

劉劬

傳第四十七

宋書八十七

蕭惠開

殷琰

傳第四十八

宋書八十八

薛安都

沈文秀

崔道固

傳第四十九

宋書八十九

袁粲

傳第五十

宋書九十

明四王

邵陵殤王友

隨陽王翽

新興王嵩

始建王禧

傳第五十一

宋書九十一

孝義

龔穎

劉瑜

郭世道

嚴世期

吳達

潘綜

萬曆二十二年刊

宋書目錄

五

孫法宗

蔣恭

張進之

許昭先

余齊民

孫棘

何子平

傳第五十二

宋書九十二

良吏

王鎮之

杜慧度

徐豁

陸徽

阮長之

江秉之

王歆之

傳第五十三

宋書九十三

隱逸

戴顓

宗炳

周續之

王弘之

阮萬齡

孔淳之

劉凝之

龔祈

翟法賜

陶潛

宗或之

沈道虔

郭希林

雷次宗

朱百年

王素

劉睦之

關康之

傳第五十四

宋書九十四

恩倖

戴法興

戴明寶

徐爰

阮佃夫

于天寶

壽寂之

姜產之

李道兒

王道隆

楊運長

傳第五十五

宋書九十五

索虜

傳第五十六

宋書九十六

鮮卑

吐谷渾

傳第五十七

宋書九十七

夷蠻

南夷

扶南國

西南夷

呵羅單國

婆皇國

婆達國

闍婆達國

師子國

天竺迦毗黎國

東夷高句驪國

百濟國

倭國

荆離州蠻

豫州蠻

傳第五十八

宋書九十八

氏胡

胡大且渠蒙遜

張掖

傳第五十九

宋書九十九

二凶

元凶劭

始興王濬

傳第六十

宋書一百

自序

宋書目錄

嘉曆二十二年刊

宋書目錄

十七

本紀第一

宋書一

臣沈

約新撰

皇明

南京國子監

祭酒陸

可教

司業馮

夢禎

司業季

道統校閱

武帝上

高祖武皇帝諱裕字德輿小名寄奴彭城縣綏里人漢高帝弟楚元王交之後也交生紅懿侯富富生宗正辟彊辟彊生陽城繆侯德德生陽

城節侯安民安民生陽城釐侯慶忌慶忌生陽
城肅侯岑岑生宗正平平生東武城令某某生
東萊太守景景生明經洽洽生博士弘弘生瑯
邪都尉悝悝生魏定襄太守某某生邪城令亮
亮生晉北平太守膺膺生相國掾熙熙生開封
令旭孫旭孫生混始過江居晉陵郡丹徒縣之
京口里官至武原令混生東安太守靖靖生郡
功曹翹是爲晉主考高祖以晉哀帝興寧元年歲
次癸亥三月壬寅夜生及長身長七尺六寸風

骨竒特家貧有大志不治廉隅事繼母以孝謹
稱初爲冠軍孫無終司馬安帝隆安三年十一
月妖賊孫恩作亂於會稽晉朝衛將軍謝琰前
將軍劉牢之東討牢之請高祖參府軍事十二
月牢之至吳而賊緣道屯結牢之命高祖與數
十人覘賊遠近曾遇賊至衆數千人高祖便進
與戰所將人多之而戰意方厲手奮長刀所殺
傷甚衆牢之子以宣疑高祖淹久恐爲賊所困
乃輕騎尋之既而衆騎並至賊乃奔退斬獲千

餘人摧鋒而進平山陰恩遁還入海四年五月
恩復入會稽殺衛將軍謝琰十一月劉牢之復
率眾東征恩退走牢之屯上虞使高祖戍句章
城句章城既卑小戰士不盈數百高祖常被堅
執銳爲士卒先每戰輒摧鋒陷陣賊乃退還浹
口于時東伐諸帥御軍無律士卒暴掠甚爲百
姓所苦唯高祖法令明整所至莫不親賴焉五
年春孫恩頻攻句章高祖屢摧破之恩復走入
海三月恩北出海鹽高祖追而翼之築城於海
鹽故治賊日來攻城城內兵力甚弱高祖乃選
敢死之士數百人咸脫甲冑執短兵竝鼓譟而
出賊震懼奪氣因其懼而奔之竝棄甲散走斬
其大帥姚盛雖連戰尅勝然眾寡不敵高祖獨
深慮之一夜偃旗匿眾若已遁者明晨開門使
羸疾數人登城賊遙問劉詳所在曰夜已走矣
賊信之乃率眾大上高祖乘其懈怠奮擊大破
之恩知城不可下乃進向滬瀆高祖復棄城追
之海鹽令鮑陋遣子嗣之以吳兵一千請爲前

驅高祖曰賊兵甚精吳人不習戰若前驅失利必敗我軍可在後爲聲援不從是夜高祖多設伏兵兼置旗鼓然一處不過數人明日賊率衆萬餘迎戰前驅旣交諸伏皆出舉旗鳴鼓賊謂四面有軍乃退嗣之追奔爲賊所沒高祖且戰且退賊盛所領死傷且盡高祖慮不免至向伏兵處乃止令左右脫取死人衣賊謂當走反停疑猶有伏高祖因呼更戰氣色甚猛賊衆以爲然乃引軍去高祖徐歸然後散兵稍集五月孫

恩破滬瀆殺吳國內史袁山松死者四千人是月高祖復破賊於婁縣六月恩乘勝浮海奄至丹徒戰士十餘萬劉牢之猶屯山陰京邑震動高祖倍道兼行與賊俱至于時衆力既寡加以步遠疲勞而丹徒守軍莫有鬪志恩率衆數萬鼓噪登蒜山居民皆荷檐而立高祖率所領奔擊大破之投巘赴水死者甚衆恩以鼓排音自載僅得還船雖被摧破猶恃其衆力徑向京師樓船高大值風不得進旬日乃至白石尋知劉

牢之已還朝廷有備遂走向鬱洲八月以高祖
爲建武將軍下邳太守領水軍追恩至鬱洲復
大破恩恩南走十一月高祖追恩於滬瀆及海
鹽又破之三戰竝大獲俘馘以萬數恩自是饑
饉疾疫死者大半自浹口奔臨海元興元年正
月驃騎將軍司馬元顯西伐荊州刺史桓玄玄
亦率荆楚大衆下討元顯元顯遣鎮北將軍劉
牢之拒之高祖參其軍事次溧洲玄至高祖請
擊之不許將遣子敬宣詣玄請和高祖與牢之

甥東海何無忌竝固請不從遂遣敬宣詣玄玄
尅京邑殺元顯以牢之爲會稽內史懼而告高
祖曰便奪我兵禍其至矣今當北就高雅於廣
陵舉事卿能從我去乎荅曰將軍以勁卒數萬
望風降服彼新得志威震天下三軍人情都已
去矣廣陵豈可得至耶諱當反服還京口耳牢
之叛走自縊死何無忌謂高祖曰我將何之高
祖曰鎮北去必不免卿可隨我還京口桓玄必
能守節北面我當與卿事之不然與卿圖之今

方是玄矯情任筭之日必將用我輩也桓玄從兄脩以撫軍鎮丹徒以高祖爲中兵參軍軍郡如故孫恩自奔敗之後徒旅漸散懼生見獲乃於臨海投水死餘衆推恩妹夫盧循爲主桓玄欲且緝寧東土以循爲永嘉太守循雖受命而寇暴不已五月玄復遣高祖東征時循自臨海入東陽二年正月玄復遣高祖破循於東陽循奔永嘉復追破之斬其大帥張士道追討至于晉安循浮海南走六月加高祖彭城内史桓玄爲楚王將謀篡盜玄從兄衛將軍謙屏人問高祖曰楚王勲德隆重四海歸懷朝廷之情咸謂宜有揖讓卿意以爲何如高祖旣志欲圖玄乃遜辭答曰楚王宣武之子勲德蓋世晉室微弱民望久移乘運禪代有何不可謙喜曰卿謂可爾便當是真可爾十二月桓玄篡帝位遷天子於尋陽桓脩入朝高祖從至京邑玄見高祖謂司徒王謐曰昨見劉諱風骨不恒蓋人傑也每遊集輒引接慇懃贈賜甚厚高祖愈惡之或說

玄曰劉諱龍行虎步瞻視不凡恐不為人下宜

蚤為其所玄曰我方欲平蕩中原非劉諱莫可

付以大事關隴平定然後當別議之耳玄乃下

詔曰劉諱以寡制眾屢摧妖鋒汎海窮追十殄

其八諸將力戰多被重創自元帥以下至于將

士竝宜論賞以敘勲烈先是高祖東征盧循何

無忌隨至山陰勸於會稽舉義高祖以為玄未

據極位且會稽遙遠事濟為難俟其篡逆事著

徐於京口圖之不憂不剋至是桓脩還京高祖

託以金創疾動不堪步從乃與無忌同船共還

建興復之計於是與弟道規沛郡劉毅平昌孟

昶任城魏詠之高平檀憑之琅邪諸葛長民太

原王元德隴西辛扈與東莞童厚之竝同義謀

時桓脩弟弘為征虜將軍青州刺史鎮廣陵道

規為弘中兵參軍昶為州主簿乃令毅潛往就

昶聚徒於江北謀起兵殺弘長民為豫州刺史

刁逵左軍府參軍謀據歷陽相應元德厚之謀

於京邑聚眾攻玄竝剋期齊發三年二月己丑

朔乙卯高祖託以遊獵與無忌等收集義徒凡
同謀何無忌魏詠之詠之弟欣之順之檀憑之
憑之從子韶弟祗隆與叔道濟道濟從兄範之
高祖弟道憐劉毅從弟藩孟昶昶族弟懷玉
河內向彌管義之陳留周安穆臨淮劉蔚從弟
珪之東莞臧喜從弟寶符從子穆生童茂宗陳
郡周道民魚陽田演譙國范清等二十七人願
從者百餘人丙辰詰旦城開無忌服傳詔服稱
詔居前義衆馳入齊聲大呼吏士驚散莫敢動
卽斬脩以徇高祖哭甚慟厚加殯斂孟昶勸弘
其日出獵未明開門出獵人昶道規毅等率壯
士五六十人因開門直入弘方噉粥卽斬之因
收衆濟江義軍初尅京城脩司馬刁弘率文武
佐吏來赴高祖登城謂之曰郭江州已奉乘輿
反正於尋陽我守竝被密詔誅除逆黨同會今
日賊玄之首已當梟於大航矣諸君非大晉之
臣乎今來欲何爲弘等信之收衆而退毅既至
高祖命誅弘毅兄邁先在京師事未發數日高

祖遣同謀周安穆報之使爲內應邁外雖酬許
內甚震懼安穆見其惶駭慮事必泄乃馳歸時
玄以邁爲竟陵太守邁不知所爲便下船欲之
郡是夜玄與邁書曰北府人情云何卿近見劉
諱何所道邁謂玄已知其謀晨起白之玄驚懼
封邁爲重安侯既而廉邁不執安穆使得逃去
乃殺之誅元德扈興厚之等召桓謙卞範之等
謀拒高祖謙等曰亟遣兵擊之玄曰不然彼兵
速銳計出萬死若行遣水軍不足相抗如有蹉

跌則彼氣成而吾事敗矣不如屯大衆於覆舟
山以待之彼空行二百里無所措手銳氣已挫
既至忽見大軍必驚懼駭愕我案兵堅陣勿與
交鋒彼求戰不得自然走散此計之上也謙等
固請乃遣頓丘太守吳甫之右衛將軍皇甫敷
北拒義軍玄自聞軍起憂懼無復爲計或曰劉
諱等衆力甚弱豈辦之有成陛下何慮之甚玄
曰劉諱足爲一世之雄劉毅家無擔石之儲樗
蒲一擲百萬何無忌劉牢之甥酷似其舅共舉

大事何謂無成衆推高祖爲盟主移檄京邑曰
夫治亂相因理不常泰狡焉肆虐或值聖明自
我大晉陽九屢構隆安以來難結皇室忠臣碎
於虎口貞良弊於豺狼逆臣桓玄陵虐人鬼阻
兵荆郢肆暴都邑天未亡難凶力繁興踰年之
間遂傾皇祚主上播越流幸非所神器沉淪七
廟毀墜夏后之罹泥犴有漢之遭莽卓方之於
玄未足爲喻自玄篡逆于今歷年亢旱彌時民
無生氣加以士庶疲於轉輸文武困於造築父

子乖離室家分散豈唯大東有杼軸之悲標梅
有傾筐之壑而已哉仰觀天文俯察人事此而
能久孰有可亡凡在有心誰不扼腕等所以
叩心泣血不遑啓處者也是故夕寐宵興援獎
忠烈潛構崎嶇險過履虎輔國將軍劉毅廣武
將軍何無忌鎮北主簿孟昶兖州主簿魏詠之
寧遠將軍劉道規龍驤將軍劉藩振威將軍檀
憑之等忠烈斷金精貫白日荷戈奮袂志在畢
命益州刺史毛璩萬里齊契掃定荆楚江州刺

史郭昶之奉迎主上宮于尋陽鎮北參軍王元德等竝率部曲保據石頭揚武將軍諸葛長民收集義士已據歷陽征虜參軍庾曠之等潛相連結以爲內應同力協規所在蜂起即日斬僞徐州刺史安城王脩青州刺史弘首義衆旣集文武爭先咸謂不有一統則事無以輯諱辭不獲已遂揔軍要庶上憑祖宗之靈下罄義夫之力剪馘逋逆蕩清京輦公侯諸君或世樹忠貞或身荷爵寵而竝俛眉猾豎自効莫由顧瞻周

道寧不弔乎今日之舉良其會也

諱

以虛薄才

非古人勢接於已踐之機受任於旣積之運丹誠未宣感慨憤躍望霄漢以永懷眇山川以增厲授檄之日神馳賊廷以孟昶爲長史揔攝後事檀憑之爲司馬百姓願從者千餘人三月戊午朔遇吳甫之於江乘甫之玄驍將也其兵甚銳高祖躬執長刀大呼以衝之衆皆披靡即斬甫之進至羅落橋皇甫敷率數千人逆戰寧遠將軍檀憑之與高祖各御一隊憑之戰敗見殺

其衆退散高祖進戰彌厲前後奮擊應時摧破
即斬數首初高祖與何無忌等共建大謀有善
相者相高祖及無忌等竝當大貴其應甚近惟
云憑之無相高祖與無忌密相謂曰吾等旣爲
同舟理無偏異吾徒咸皆富貴則檀不應獨殊
深不解相者之言至是而憑之戰死高祖知其
事必捷玄聞歟等竝沒愈懼使桓謙屯東陵口
卜範之屯覆舟山西衆合二萬己未旦義軍食
畢棄其餘糧進至覆舟山東使丐士張旗幟於

山上以爲疑兵玄又遣武騎將軍庾禕之配以
精卒利器助謙等高祖躬先士卒以奔之將士
皆殊死戰無不一當百呼聲動天地時東北風
急因命縱火煙爛張天鼓噪之音震京邑謙等
諸軍一時土崩玄始雖遣軍置陳而走意已決
別使領軍將軍殷仲文具舟於石頭仍將子姪
浮江南走庚申高祖鎮石頭城立留臺官焚桓
溫神主於宣陽門外造晉新主立于太廟遣諸
將帥追玄尚書王假率百官奉迎乘輿司徒王

謚與衆議推高祖領揚州固辭乃以謚爲錄尚書事領揚州刺史於是推高祖爲使持節都督揚徐兗豫青冀幽并八州諸軍事領軍將軍徐州刺史先是朝廷承晉氏亂政百司縱弛桓玄雖欲釐整而衆莫從之高祖以身範物先以威禁內外百官皆肅然奉職二三日間風俗頓改且桓玄雖以雄豪見推而一朝便有極位晉氏四方牧守及在朝大臣盡心伏事臣主之分定矣高祖位微於朝衆無一旅奮臂草萊之中倡

大義以復皇祚由是王謚等諸人時衆民望莫不愧而憚焉諸葛長民失期不得發刁逵執送之未至而玄敗玄經尋陽江州刺史郭昶之備乘輿法物資之玄收略得二千餘人挾天子走江陵冠軍將軍劉毅輔國將軍何無忌振武將軍劉道規率諸軍追討尚書左僕射王愉愉子荊州刺史綏等江左冠族綏少有重名以高祖起自布衣甚相凌忽綏桓氏甥亦有自疑之志高祖悉誅之四月奉武陵王遵爲大將軍承制


大赦天下唯桓玄一祖後不在赦例初高祖家
貧嘗負刁逵社錢三萬經時無以還逵執錄甚
嚴王謐造逵見之密以錢代還由是得釋高祖
名微位薄盛流皆不與相知唯謐交焉桓玄將
篡謐手解安帝璽紱爲玄佐命功臣及義旗建
衆竝謂謐宜誅唯高祖保持之劉毅嘗因朝會
問謐璽紱所在謐益懼及王愉父子誅謐從弟
謐謂謐曰王駒無罪而義旗誅之此是剪除勝
已以絕民望兄既桓氏黨附名位如此欲求免
得乎駒愉小字也謐懼奔于曲阿高祖牋白大
將軍深相保護謐迎還復位光祿勳丁承之左衛
將軍褚粲游擊將軍司馬秀役使官人爲御史
中丞王禎之所糾察謝朓言辭怨憤承之造司
宜藏高祖與大將軍牋白粲等備位大臣所懷
必盡執憲不允自應據理陳訴而橫興怨忿歸
咎有司宜加裁當以清風軌竝免官桓玄兒子
韶聚衆向歷陽高祖命輔國將軍諸葛長民擊
走之無忌道規破玄大將鄭鈐等于桑落洲衆

軍進據尋陽加高祖都督江州諸軍事玄既還
荆郢大聚兵衆召水軍造樓船器械率衆二萬
挾天子發江陵浮江東下與冠軍將軍劉毅等
相遇於崢嶸洲衆驚下擊大破之玄棄衆復挾
天子還復江陵玄黨殷仲文奉晉二皇后還京
師玄至江陵因西走南郡太守王騰之荆州別
駕王康產奉天子入南郡府初征虜將軍益州
刺史毛璩遣從孫祐之與參軍費活送弟喪下
有衆二百璩弟子脩之時爲玄屯校尉誘玄

以入蜀至枚回洲活與祐之迎射之益州督護
馮遷斬玄首傳京師又斬玄子昇於江陵市初
玄敗於崢嶸洲義軍以爲大事已定追躡不速
玄死幾一旬衆軍猶不至玄從子振逃於華容
之浦中招聚逆黨數千人晨襲江陵城居民競
出赴之騰之康產皆被殺桓謙先匿於沮川亦
聚衆以應振爲玄舉哀立喪廷謙率衆官奉璽
綬于安帝無忌道規旣至江陵與桓振戰于靈
溪玄黨馮該又設伏于楊林義軍奔敗退還尋

陽兖州刺史辛禹懷貳會北青州刺史劉該反
 禹求征該次淮陰又反禹長史羊穆之斬禹傳
 首京師十月高祖領青州刺史甲仗百人入殿
 劉毅諸軍復進至夏口毅攻魯城道規攻偃月
 壘皆拔之十二月諸軍進平巴陵義熙元年正
 月毅等至江津破桓謙桓振江陵平天子反正
 三月天子至自江陵詔曰古稱大者天地其次
 君臣所以列貫三辰神人代序諒理本於造昧
 而運周於萬葉故_以盈否時襲四靈通其變王道

或昧貞賢拯其危天命所以永固人心所以
 穆雖夏周中傾賴靡申之績莽倫載竊寔二代
 是維或乘資藉號或業隆異世猶詩書以之休
 詠記策用為美談未有因心撫民而誠發理應
 援神器於已淪若在今之盛者也朕以寡昧遭
 家不造越自邁閔屬當屯極逆臣桓玄乘豐縱
 憑窮凶恣虐滔天猾夏遂誣罔人神肆其篡亂
 祖宗之基既湮七廟之饗胥殄若墜淵谷未足
 斯譬皇度有晉天縱英哲使持節都督揚徐兖



豫青冀幽并江九州諸軍事鎮軍將軍徐青二
州刺史忠誠天亮神武命世用能貞明協契義
夫響臻故順聲一唱二溟卷波英風振路宸居
清翳暨冠軍將軍毅輔國將軍無忌振武將軍
道規舟旗邁邁而元凶傳首回戈疊揮則荆漢
霧廓俾宣元之祚永固于嵩岱傾基重造再集
於朕躬宗廟歆七百之祐皇基融載新之命念
功惟德永言銘懷固已道冠開闢獨絕終古書
契以來未之前聞矣雖則功高靡尚理至難文
而崇庸命德哲王攸先者將以弘道制治深關
盛衰故伊望膺殊命之錫桓文饗備物之禮况
宏猷不世顧邈百代者宜極名器之隆以光大
國之盛而填軍謙虛自衷誠旨屢顯朕重逆仲
父乃所以愈彰德美也鎮軍可進位侍中車騎
將軍都督中外諸軍事使持節徐青二州刺史
如故顯祚大邦啓茲疆宇高祖固讓加錄尚書
事又不受屢請歸藩天子不許遣百僚敦勸又
親幸公第高祖惶懼詣闕陳請天子不能奪是

月旋鎮丹徒天子重遣大使敦勸又不受乃改授都督荆司梁益寧雍涼七州并前十六州諸軍事本官如故於是受命解青州加領兗州刺史盧循浮海破廣州獲刺史吳隱之即以循爲廣州刺史以其同黨徐道覆爲始興相二年三月督交廣二州十月高祖上言曰昔天禍皇室巨狡縱篡臣等義惟舊隸豫蒙國恩仰契信順之符俯厲人臣之情雖社稷之靈抑亦事由衆濟其翼獎忠勲之佐文武畢力之士數執在已

之謙用虧國體之大輒攝衆軍先上同謀起義始乎京口廣陵二城臣及撫軍將軍毅等二百七十二人并後赴義出都緣道大戰所餘一千五百六十六人又輔國將軍長民故給事中王元德等十人合一千八百四十八人乞正封賞其西征衆軍須論集續上於是尚書奏封唱義謀主鎮軍將軍諱豫章郡公食邑萬戶賜絹三萬匹其餘封賞各有差鎮軍府佐吏降故太傅謝安府一等十一月天子重申前令加高祖侍

中進號車騎將軍開府儀同三司固讓詔遣百僚敦勸三年二月高祖還京師將詣廷尉天子先詔獄官不得受詣闕陳讓乃見聽旋于丹徒閏月府將駱冰謀作亂將被執單騎走追斬之誅冰父永嘉太守球球本東陽郡史孫恩之亂起義於長山故見擢用初桓玄之敗以桓冲忠貞著其孫胤至是冰謀以胤爲主與東陽太守殷仲文潛相連結乃誅仲文及仲文二弟凡桓玄餘黨至是皆誅矣天子遣兼太常葛籍授公

策曰有扈滔天夷羿乘釁亂節干紀實撓皇極賊臣桓玄怙寵肆逆乃摧傾華霍倒拔嵩岱五嶽既夷六地易所公命世英縱藏器待時因心資敬誓雪國恥慨憤陵夷誠發宵寐既而歲月屢遷神器已遠忠孝幽寄寔貫三靈爾乃介石勝機宣契畢舉訴蒼天以爲正揮義旅而一驅奔鋒數百勢烈激電百萬不能抗限制路日直植城遂使衝鯨潰流暴鱗奔漢廟勝遠加重氛載滌二儀廓清三光返照事遂永代功高開闢

理微稱謂義感朕心若夫道爲身濟猶縻厥爵
況乃誠德俱深勲貫天人者乎是用建茲邦國
永祚山河言念載懷匪云足報往欽哉俾屏余
一人長弼皇晉流風垂祚暉烈無窮其降承嘉
策對敷朕命十二月司徒錄尚書揚州刺史王
謐薨四年正月徵公入輔授侍中車騎將軍開
府儀同三司揚州刺史錄尚書徐兗二州刺史
如故表解兗州先是遣冠軍劉敬宣伐蜀賊譙
縱無功而返九月以敬宣挫退遜位不許乃降

爲中軍將軍開府如故初僞燕主鮮卑慕容德
僭號於青州德死兄子超襲位前後屢爲邊患
五年二月大掠淮北執陽平太守劉千載濟南
太守趙元驅略千餘家三月公抗表北討以丹
陽尹孟昶監中軍留府事四月舟師發京都泝
淮入泗五月至下邳留船艦輜重步軍進琅邪
所過皆築城留守鮮卑梁父莒城二戍竝奔走
慕容超聞王師將至其大將公孫五樓說超宜
斷據大峴刈除粟苗堅壁清野以待之彼僞軍

無資求戰不得旬月之間折棰以答之耳超不從曰彼遠來疲勞勢不能久但當引令過峴我以鐵騎踐之不憂不破也豈有預芟苗稼先自臧弱邪初公將行議者以爲賊聞大軍遠出必不敢戰若不斷大峴當堅守廣固刈粟清野以絕三軍之資非唯難以有功將不能自反公曰我揣之熟矣鮮卑貪不及遠計進利尅獲退惜粟苗謂我孤軍遠入不能持久不過進據臨朐退守廣固我一得入峴則人無退心驅必死之

衆向懷貳之虜何憂不尅彼不能清野固守爲諸君保之公旣入峴舉手指天曰吾事濟矣六月慕容超遣五樓及廣寧王賀賴盧先據臨朐城旣聞大軍至留羸老守廣固乃悉出臨朐有巨蔑水去城四十里超告五樓曰急往據之晉軍得水則難擊也五樓馳進龍驤將軍孟龍符領騎居前奔往爭之五樓乃退衆軍步進有車四千兩分車爲兩翼方軌徐行車悉張幔御者執稍又以輕騎爲遊軍軍令嚴肅行伍齊整未

及臨朐數里賊鐵騎萬餘前後交至公命兗州
刺史劉藩弟并州刺史道憐諮議參軍劉敬宣
陶延壽參軍劉懷玉慎仲道索邈等齊力擊之
日向昃公遣諮議參軍檀韶直趨臨朐韶率建
威將軍向彌參軍胡藩馳往即日陷城斬其牙
旗悉虜超輜重超聞臨朐已拔引衆走公親鼓
之賊乃大奔超遁還廣固獲超馬僞輦玉璽豹
尾等送于京師斬其大將段暉等十餘人其餘
斬獲千計明日大軍進廣固即屠大城超退保

小城於是設長圍守之圍高三丈外穿三重濬
停江淮轉輸館穀於齊土撫納降附華戎歡悅
援才授爵因而任之七月詔加公北青冀二州
刺史超大將垣遵遵弟苗竝率衆歸順公方治
攻具城上人曰汝不得張綱何能爲也綱者超
僞尚書郎其人有巧思會超遣綱稱藩於姚興
乞師請救興僞許之而實憚公不敢遣綱從長
安還泰山太守申宣執送之乃升綱於樓上以
示城內城內莫不失色於是使綱大治攻具超

求救不獲綱反見虜轉憂懼乃請稱藩求割大
峴爲界獻馬千疋不聽圍之轉急河北居民荷
戈負糧至者日以千數錄事參軍劉穆之有經
略才具公以爲謀主動止必諮焉時姚興遣使
告公云慕容見與隣好又以窮告急今當遣鐵
騎十萬逕據洛陽晉軍若不退者便當遣鐵騎
長驅而進公呼興使荅曰語汝姚興我定燕之
後息甲三年當平關洛今能自送便可速來穆
之聞有羌使馳入而公發遣已去以興所言并

荅具語穆之穆之尤公曰常日事無大小必賜
與謀之此宜善詳之云何卒爾便荅公所荅興
言未能威敵正足怒彼耳若燕未可拔羌救奄
至不審何以待之公笑曰此是兵機非卿所解
故不語耳夫兵貴神速彼若審能遣救必畏我
知寧容先遣信命此是其見我伐燕內已懷懼
自張之辭耳九月進公太尉中書監固讓僞徐
州刺史段宏先奔索虜十月河北歸順張綱治
攻具成設諸奇巧飛樓木幔之屬莫不畢備城

上石弓矢無所用之六年二月丁亥屠廣固
超踰城走征虜賊曹喬胥獲之殺其亡命以下
納口萬餘馬二千疋送超京師斬于建康市公
之北伐也徐道覆仍有闖關之志勸盧循乘虛
而出循不從道覆乃至番禺說循曰本住嶺外
豈以理極於此正以劉公難與爲敵故也今方
領兵堅城之下未有旋日以此思歸死士掩襲
何劉之徒如反掌耳不乘此機而保一日之安
若平齊之後小息甲養衆不過一二年間必重

書徵君若劉公自率無至豫章遣銳師過嶺雖
復將軍神武恐必不能當也今日之機萬不可
失既尅都邑傾其根本劉公雖還無能爲也循
從之乃率衆過嶺是月寇南康廬陵豫章諸郡
守皆委任奔走于時平齊問未至即馳使徵公
公之初尅齊也欲停鎮下邳清盪河洛旣而被
徵使至即日班師鎮南將軍何無忌與徐道覆
戰于豫章敗績無忌被害內外震駭朝廷欲奉
乘輿北走就公尋知賊定未至人情小安公至

下邳以船運輜重自率精銳步歸至山陽聞無
忌被害則慮京邑失守乃卷甲兼行與數十人
至淮上問行旅以朝廷消息人曰賊尚未至劉
公若還便無所憂也公大喜單船過江逕至京
口衆乃大安四月癸未公至京師解嚴息甲撫
軍將軍劉毅抗表南征公與毅書曰吾往習擊
妖賊曉其變態新獲新利其鋒不可輕宜須裝
嚴畢與弟同舉又遣毅從弟藩往止之毅不從
舟師二萬發自姑孰循皖之初下也使道覆向尋

陽自寇湘中諸郡荊州刺史道規遣軍至長沙
爲循所敗逕至巴陵將向江陵道覆聞毅上馳
使報循曰毅兵衆甚盛成敗事係之於此宜并
力摧之若此克捷天下無復事矣根本既定不
憂上面不平也循即日發巴陵與道覆連旗而
下別有八艘艦九枚起四層高十二丈公以南
藩覆沒表送章綬詔不聽五月劉毅敗績于桑
落洲棄船步走餘衆不得去者皆爲賊所擒初
循至尋陽聞公已還不信也旣破毅乃審凱入

之問竝相視失色循欲退還尋陽進平江陵據
二州以抗朝廷道覆謂宜乘勝徑進固爭之疑
議多日乃見從毅敗問至內外洶擾于時北師
始還多創痍疾病京師戰士不盈數千賊旣破
江豫二鎮戰士十餘萬舟車百里不絕奔敗還
者竝聲其雄盛孟昶諸葛長民懼寇漸逼欲攤
天子過江公不聽昶固請不止公曰今重鎮外
傾疆寇內逼人情危駭莫有固志若一旦遷動
便自瓦解土崩江北亦豈可得至設令得至不

過延日月耳今兵士雖少自足以一戰若其克
濟則臣主同休苟厄運必至我當以死衛社稷
橫尸廟門遂其由來以身許國之志不能遠竄
於草間求活也我計決矣卿勿復言昶恐其不
濟乃爲表曰臣諱北討衆竝不同唯臣贊諱行
計致使疆賊乘間社稷危逼臣之臯也今謹引
分以謝天下封表畢乃仰藥而死於是大開賞
募投身赴義者一同登京城之科發居民治石
頭城建牙誠嚴時議者謂宜分兵守諸津要公

以爲賊衆我寡若分兵屯則測人虛實且一處
失利則沮三軍之心今聚衆石頭隨宜應赴旣
令賊無以測多少又於衆力不分若徒旅轉集
徐更論之耳移屯石頭乃柵淮斷查浦旣而羣
賊大至公策之曰賊若於新亭直進其鋒不可
當宜且迴避勝負之事未可量也若回泊西岸
此成擒耳道覆欲自新亭白石焚舟而上循多
疑少決每欲以萬全爲慮謂道覆曰大軍未至
孟昶便望風自裁大勢言之自當計日潰亂之
決勝負於一朝旣非必定之道且殺傷士卒不
如按兵待之公于時登石頭城以望循軍初見
引向新亭公顧左右失色旣而回泊蔡洲道覆
猶欲上循禁之自是衆軍轉集修治越城築查
浦藥園廷尉三壘皆府以實衆冠軍將軍劉敬
宣屯北郊輔國將軍孟懷玉屯丹陽郡西建武
將軍王仲德屯越城廣武將軍劉默屯建陽門
外使寧朔將軍索邈領鮮卑具裝虎班突騎千
餘匹皆被練五色自淮北至于新亭賊竝聚觀

咸畏憚之然猶冀京邑及三吳有應之者遣十
餘艦來拔石頭柵公命神弩射之發輒摧陷循
乃止不復攻柵設伏兵於南岸使羸老悉乘舟
艦向白石公憂其從白石步上乃率劉毅諸葛
長民北出拒之留參軍徐赤特戍南岸命堅守
勿動公既去賊焚查浦步上赤特軍戰敗死没
有百餘人赤特棄餘衆單舸濟淮賊遂率數萬
屯丹陽郡公率諸軍馳歸衆憂賊過咸謂公當
徑還拒戰公先分軍還石頭衆莫之曉解甲息
士洗浴飲食之乃出列陳於南塘以赤特違處
分斬之命參軍諸葛叔度朱齡石率勁勇千餘
人過淮羣賊數千皆長戈矛鋌精甲曜日奮躍
爭進齡石所領多鮮卑善步稍竝結陳以待之
賊短兵弗能抗死傷者數百人乃退走會日莫
衆亦歸劉毅之敗豫州主簿袁興國反叛據歷
陽以應賊琅邪內史魏順之遣將謝寶討斬之
興國司馬襲寶順之不救而退公怒斬之順之
詠之之弟也於是功臣震攝莫敢不用命六月

更授公太尉中書監加黃鉞受黃鉞餘固辭以
司馬庾悅爲建威將軍江州刺史自東陽出豫
章七月庚申羣賊自蔡洲南走還屯尋陽遣輔
國將軍王仲德廣川太守劉鍾河間太守蒯恩
追之公還東府大治水軍皆大艦重樓高者十
餘丈盧循遣其大將荀林寇江陵桓謙先於江
陵奔羌又自羌入蜀僞主譙縱以爲荊州刺史
謙及譙道福率軍二萬出寇江陵適與林會相
去百餘里荊州刺史道規斬謙于枝江破林於
江津追至竹町斬之初循之走也公知其必寇
江陵登遣淮陵內史索邈領馬軍步道援荊州
又遣建威將軍孫季高率衆三千自海道襲番
禺江州刺史庾悅至五畝嶠賊遣千餘人據斷
嶠道悅前驅鄱陽太守虞丘進攻破之公治兵
大辦十月率兗州刺史劉藩寧朔將軍檀韶等
舟師南伐以後將軍劉毅監太尉留守府後事
皆委焉是月徐道覆率衆三萬寇江陵荊州刺
史道規又大破之斬首萬餘級道覆走還盆口

初公之遣索邈也邈在道爲賊所斷道覆敗後
方達自循東下江陵斷絕京邑之間傳者皆云
已沒及邈至方知循走循初自蔡洲南走留其
親黨范崇民五千人高艦百餘戍南陵王仲德
等聞大軍且至乃進攻之十一月大破崇民軍
焚其舟艦收其散卒循廣州守兵不以海道爲
防是月建威將軍孫季高乘海奄至而城池峻
整兵猶數千季高焚賊舟艦悉力而上四面攻
之即日屠其城循父以輕舟奔始興季高撫其
舊民戮其親黨勒兵謹守初公之遣季高也衆
咸以海道艱遠必至爲難且分徹見力二三非
要公不從勅季高曰大軍十二月之交必破妖
虜卿今時當至廣州傾其巢窟令賊奔走之日
無所歸投季高受命而行如期尅捷循方治兵
旅舟艦設諸攻備公欲御以長筭乃屯軍雷池
賊揚聲不攻雷池當乘流逕下公知其欲戰且
慮賊戰敗或於京江入海遣王仲德以水艦二
百於吉陽下斷之十二月循道覆率衆數萬方

艦而下前後相抗莫見舳艫之際公悉出輕利
鬪艦躬提幡鼓命衆軍齊力擊之又上步騎於
西岸右軍參軍庾樂生乘艦不進斬而徇之於
是衆軍竝踊騰爭先軍中多萬鈞神弩所至莫
不摧陷公中流蹙之因風水之勢賊艦悉泊西
岸上軍先備火具乃投火焚之煙燭張天賊衆
大敗追奔至夜乃歸循等還尋陽初分遣步軍
莫不疑怪及燒賊艦衆乃悅服召王仲德請還
爲前驅留輔國將軍孟懷玉守雷池循聞大軍
上欲走向豫章乃悉力柵斷左里大軍至左里
將戰公所執麾竿折折幡沉水衆竝恠懼公歡
笑曰往年覆舟之戰幡竿亦折今者復然賊必
破矣即攻柵而進循兵雖殊死戰弗能禁諸軍
乘勝奔之循單舸走所殺及投水死凡萬餘人
納其降附宥其逼略遣劉藩孟懷玉輕軍追之循
收散卒尚有數千人逕還廣州道覆還保始興
公旋自左里天子遣侍中黃門勞師于行所

萬曆癸巳六月初二日始校宋書于一鑑
亭初三日完本紀一是正六字削一字

司業馮夢禎識

本紀第一

宋書一

本紀第二

宋書二

臣沈約新撰

武帝中

七年正月己未振旅于京師改授大將軍揚州
牧給班劍二十人本官悉如故固辭免南北征
伐戰亡者竝列上賻贈尸喪未反遣王帥迎接
致還本土二月盧循至番禺為孫季高所破收
餘眾南走劉藩孟懷玉斬徐道覆于始興晉自
中興以來治綱大弛權門并兼彊弱相凌百姓

萬曆二十二年刊

宋書已卷二

一

流離不得保其產業桓玄頗欲釐改竟不能行
公既作輔大示軌則豪彊肅然遠近知禁至是
會稽餘姚虞亮復藏匿亡命千餘人公誅亮免
會稽內史司馬休之天子又申前命公固辭於
是改授太尉中書監乃受命奉送黃鉞解冀州
交州刺史杜慧度斬盧循傳首京師先是諸州
郡所遺秀才孝廉多非其人公表天子申明舊
制依舊策試征西將軍荊州刺史道規疾患求
歸八年四月改授豫州刺史以後將軍豫州刺

史劉毅代之毅與公俱興大義興復晉室自謂
京城廣陵功業足以相抗雖權事推公而心不
服也毅既有雄才大志厚自矜許朝士素望者
多歸之與尚書僕射謝混丹陽尹郗僧施竝深
相結及西鎮江陵豫州舊府多割以自隨請僧
施爲南蠻校尉公既知毅不能居下終爲異端密
圖之毅至西稱疾篤表求從弟兗州刺史藩以
爲副貳僞許焉九月藩入朝公命收藩及謝混
竝於獄賜死自表討毅又假黃鉞率諸軍西征

以前鎮軍將軍司馬休之爲平西將軍荊州刺史
史兖州刺史道憐鎮丹徒豫州刺史諸葛長民
監太尉留府事加太尉司馬丹陽尹劉穆之建
威將軍配以實力壬午發自京師遣參軍王鎮
惡龍驤將軍蒯恩前襲江陵十月鎮惡尅江陵
毅及黨與皆伏誅十一月己卯公至江陵下書
曰夫去弊拯民必存簡恕捨網修綱雖煩易理
江荆彫殘刑政多闕頃年事故綏撫未週遂令
百姓疲匱歲月滋甚財傷役困慮不幸生彫殘
之餘而不減舊刻剥徵求不循政道宰莅之司
或非良幹未能菲躬儉苟求盈給積習生常漸
不知改近因戎役來涉二州踐境親民愈見其
瘼思欲振其所急卹其所苦凡租稅調役悉宜
以見戶爲正州郡縣屯田池塞諸非軍國所資
利入守宰者今一切除之州郡縣吏皆依尚書
定制實戶置臺調癸卯梓材庚子皮毛可悉停
省別量所出巴陵均折度支依舊兵運原五歲
刑已下凡所質錄賊家餘口亦悉原放以荊州

十郡爲湘州公乃進督以西陽太守朱齡石爲益州刺史率衆伐蜀進公太傅揚州牧加羽葆鼓吹班劍二十人九年二月乙丑公至自江陵初諸葛長民貪淫驕橫爲士民所患苦公以其同大義優容之劉毅旣誅長民謂所親曰昔年醢彭越今年誅韓信禍其至矣將謀作亂公克期至京邑而每淹留不進公卿以下頻日奉候於新亭長民亦驟出旣而公輕舟密至已還東府矣長民到門引前卻人閑語凡平生於長民所不盡者皆與及之長民甚說已密命左右壯士丁旡等自幔後出於坐拉焉長民墜牀又於地毆之死於牀側輿尸付廷尉并誅其弟黎民旡驍勇有氣力時人爲之語曰勿跋扈付丁旡先是山湖川澤皆爲豪彊所專小民薪採漁釣皆責稅直至是禁斷之時民居未一公表曰臣聞先王制治九土攸序分境畫疆各安其居在昔盛世人無遷業故井田之制三代以隆秦革斯政漢遂不改富彊兼并於是爲弊然九服弗

擾所託成舊在漢西京大遷田景之族以實關
中即以三輔爲鄉閭不復係之於齊楚自永嘉
播越爰託淮海朝有匡復之筭民懷思本之心
經略之圖日不暇給是以寧民綏治猶有未遑
及至大司馬桓溫以民無定本傷治爲深庚戌
土斷以一其業于時財阜國豐實由于此自茲
迄今彌歷年載畫一之制漸用積弛雜居流寓
閭伍弗脩王化所以未純民瘼所以猶在臣荷
重任恥責實深自非改調解張無以濟治夫人
情滯常難與慮始所謂父母之邦以爲桑梓者
誠以生焉終焉敬愛所託耳今所居累世墳壟
成行敬恭之誠豈不與事而至請準庚戌土斷
之科庶子本所弘稍與事著然後率之以仁義
鼓之以威武超大江而跨黃河撫九州而復舊
土則戀本之志乃速由於當年在始暫勤要終
所以能易伏惟陛下垂矜萬民憐其所天永懷
鴻鴈之詩思隆中興之業旣委臣以國重期臣
以寧濟若所啓合允請付外施行於是依界土

斷唯徐兗青三州居晉陵者不在斷例諸流寓
郡縣多被併省以公領鎮西將軍豫州刺史公
固讓太傅州牧及班劍奉還黃鉞七月朱齡石
平蜀斬僞蜀王譙縱傳首京師九月封公次子
義真爲桂陽縣公以賞平齊及定盧循也天子
重申前命授公太傅揚州牧加羽葆鼓吹班劍
二十人將吏百餘敦勸乃受羽葆鼓吹班劍餘
固辭十年息民簡役築東府起府舍平西將軍
荊州刺史司馬休之宗室之重又得江漢人心
公疑其有異志而休之兄子譙王文思在京師
招集輕俠公執文思送還休之令自爲其所休
之表廢文思弁與公書陳謝十一年正月公收
休之子文寶兄子文祖竝於獄賜死率衆軍西
討復加黃鉞領荊州刺史辛巳發京師以中軍
將軍道憐監留府事休之上表自陳曰臣聞運
不常一治亂代有陽九旣謝圮終則泰昔篡臣
肆逆皇綱絕紐十世未改鼎祚再隆太尉臣
諱
威武明斷首建義旗除蕩元凶皇居反正布衣

匹夫匡復社稷南剿盧循北定廣固千載以來
功無與等由是四海歸美朝野推崇既位窮台
牧權傾人主不能以道處功恃寵驕溢自以酬
賞既極便情在無上刑戮逆濫政用暴苛問鼎
之迹日彰人臣之禮頓缺陛下四時膳御觸事
縣空宮省供奉十不一在皇后寢疾之際湯藥
不周手與家書多所求告皆是朝士共所聞見
莫不傷懷憤歎口不敢言前揚州刺史元顯第
五息法興桓玄之釁逃遠於外王路既開始得

歸本太傅之胤絕而復興凡在有懷誰不感慶
諱吞噬之心不避輕重以法興聰敏明慧必為
民望所歸芳蘭既茂內懷憎惡乃妄扇異言無
罪即戮大司馬臣德文及王妃公主情計切逼
竝狼狽請命逆肆禍毒誓不矜許冤酷之痛感
動行路自以地卑位重荷恩崇大乃以庶孽與
德文嫡婚致茲非偶寔由威逼故衛將軍劉毅
右將軍劉藩前將軍諸葛長民尚書僕射謝混
南蠻校尉郗僧施或盛勲德胤令望在身皆社

稷輔弼協讚所寄無罪無辜一旦夷滅猜忍之
性終古所希臣自惟門戶衰破賴之獲存皇家
所重終古難匹是以公私歸馮事盡祇順再授
荊州輒苦陳告自以才弱位隆不宜久荷分陝
屢求解任必不見聽前經攜侍老母半家俱西
凡諸子姪悉留京輦臣兄子譙王文思雖年少
常人粗免咎悔性好交遊未知防遠羣醜交構
爲其風聲諱遂翦戮人士遠送文思臣順其此
旨表送章節請廢文思改襲太宗遺息文寶送

女東歸自謂推誠奉順理不過此豈意諱苞藏
禍心遂見討伐加惡文思構生罪孽羣小之言
遠近噂喑而臣純愚闇信必謂不然尋臣府司
馬張茂度狼狽東歸南平太守檀範之復以此
月三日委郡叛逆尋有審問東軍已上諱今此
舉非有怨憎正以臣王室之幹位居藩岳時賢
旣盡唯臣獨存規以翦滅成其篡殺鎮北將軍
臣宗之青州刺史臣敬宣並是諱所深忌憚欲
以次除蕩然後傾移天日於事可易今荆雍義

徒不召而集子來之衆其會如林豈臣無德所能綏致蓋七廟之靈理貫幽顯輒授文思振武將軍南郡太守宗之子竟陵太守魯軌進號輔國將軍臣今與宗之親御大衆出據江津案甲抗威隨宜應赴今絳旗所指唯諱兄弟父子而已須尅蕩寇逆尋續馳聞由臣輕弱致諱凌橫上慚俯愧無以厝顏休之府錄事參軍韓延之公之故吏也有幹用才能公未至江陵密使與之書曰文思事源遠近所知去秋遣康之送還

司馬軍者推至公之極也而了不遜愧又無表疏文思經正不反此是天地之不容吾受命西討止其父子而已彼土僑舊爲所驅逼一無所問往年郗僧施謝邵任集之等交構積歲專爲劉毅謀主所以至此卿等諸人一時逼迫本無纖釁吾處懷期物自有由來今在近路正是諸人歸身之日若大軍登道交鋒接刃蘭艾吾誠不分故具示意并示同懷諸人延之報曰承親率戎馬遠履西畿闔境士庶莫不惶駭何者莫

知師出之名故也今辱來疏始知以譙王前事
良增歎息司馬平西體國忠貞欵愛待物當於
古人中求耳以君公有匡復之勳家國蒙賴推
德委誠每事詢仰譙王往以微事見劾猶自表
遜位况以大過而當嘿然邪但康之前言有所
不盡故重使胡道諮白所懷道未及反已奏表
廢之所不盡者命耳推寄相與之懷正當如此
有何不可便興兵戈自義旗秉權以來四方方
伯誰敢不先相諮疇而逕表天子邪譙王爲宰
相所責文表廢之經正何歸表使何因可謂欲
加之罪其無辭乎劉諱足下海內之人誰不見
足下此心而復欲欺誑國士天地所不容在彼
不在此矣來示言處懷期物自有由來今伐人
之君啗人以利真可謂處懷期物自有由來者
矣劉藩死於閭闔之門諸葛斃於左右之手甘
言詫方伯襲之以輕兵使府上靡欵懷之士
聞外無自信諸侯以是爲等良可恥也貴府
將佐及朝廷賢德寄性命以過日心企太平久

矣吾誠鄙劣嘗聞道於君子以平西之至德寧
可無授命之臣乎未能自投虎口比迹郗任之
徒明矣假令天長喪亂九流渾濁當與臧洪遊
於地下不復多言公視書太息以示諸佐曰事
人當如此三月軍次江陵初雍州刺史魯宗之
常慮不爲公所容與休之相結至是率其子竟
陵太守軌會于江陵江夏太守劉虔之邀之軍
敗見殺公命彭城内史徐達之參軍王允之出
江夏口復爲軌所敗竝沒時公軍泊馬頭即日

率衆軍濟江躬督諸將登岸莫不奮踊爭先休
之衆潰與軌等奔襄陽江陵平加領南蠻校尉
將拜值四廢日佐史鄭鮮之褚叔度王弘傅亮
白遷日不許下書曰此州積弊事故相仍民疲
田蕪杼軸空匱加以舊章乖昧事後頻苦童耄
奪養老釋服戎空戶從役或越紼應召每永懷
民瘼宵分忘寢誠宜蠲除苛政弘茲簡惠庶令
凋風弊政與事而新寧一之化成於朞月荆雖
二州西局蠻府吏及軍人年十二以還六十以

上及扶養孤幼單丁大艱悉仰遣之窮獨不能
存者給其長賑府州久懃將吏依勞銓序并除
今年租稅四月公復率眾進討至襄陽休之奔
羌天子復重申前命授太傅揚州牧劔履上殿
入朝不趨贊拜不名加前部羽葆鼓吹置左右
長史司馬從事中郎四人封公第三子諱為北
彭城縣公以中軍將軍道憐為荊州刺史八月
甲子公至自江陵奉還黃鉞固辭太傅州牧前
部羽葆鼓吹其餘受命朝議以公道尊勳重不
宜復施敬護軍既加殊禮奏事不復稱名以世
子為兖州刺史十二年正月詔公依舊辟士加
領平北將軍兖州刺史增都督南秦凡二十二
州公以平北文武寡少不宜別置於是罷平北
府以併大府以世子為豫州刺史三月加公中
外大都督初公平齊仍有定關洛之意值盧循
侵逼故其事不諧荆雖既平方謀外略會羌主
姚興死子泓立兄弟相殺關中擾亂公乃戒嚴
北討加領征西將軍司豫二州刺史以世子為

徐兗二州刺史下書曰吾倡大義首自本州克復皇祚遂建勲烈外夷勅敵內清姦軌皆邦人州黨竭誠盡力之效也情若風霜義貫金石今當奉辭西旆有事關河弱嗣叨蒙復忝今授情事纏綿可謂深矣頃軍國務殷刑辟未息眷言懷之能不多歎其犯罪繫五歲以還可一原遣文武勞滿未蒙榮轉者便隨班序報公受中外都督及司州竝辭大司馬琅邪王禮敬朝議從之公欲以義聲懷遠奉琅邪王北伐五月羌僞黃門侍郎尹冲率兄弟歸順又加公北雍州刺史前部羽葆鼓吹增班劔爲四十人解中書監八月丁巳率大衆發京師以世子爲中軍將軍監太尉留府事尚書右僕射劉穆之爲左僕射領監軍中軍二府軍司入居東府揔攝內外九月公次于彭城加領徐州刺史先是遣冠軍將軍檀道濟龍驤將軍王鎮惡步向許洛羌緣道屯守皆望風降服僞兗州刺史韋華先據倉垣亦率衆歸順公又遣北兗州刺史王仲德先以

水軍入河仲德破索虜於東郡涼城進平滑臺
十月衆軍至洛陽圍金墉泓弟僞平南將軍洸
請降送于京師脩復晉五陵置守衛天子詔曰
夫嵩岱配極則乾道增輝藩岳作屏則帝王成
務是以夏殷資昆彭之伯有周倚齊晉之輔鑿
諸前典儀刑萬代翼治扶危靡不由此太尉公
命世天縱齊聖廣淵明燭四方道光宇宙爰自
闕二初迪則投懃王國妖蝥孔熾則功存社稷
字固以四維是荷萬邦攸賴者矣暨桓玄僭逆傾

蕩四海公深秉大節靈武霆震弘濟朕躬再造
王室每惟勲德銘于厥心遂北清海岱南夷百
越荆雍稽服庸岷順軌尅黜方難式遏寇虐及
阿衡王猷班序內外仰興絕風傍嗣逸業秉禮
以整俗遵王以垂訓聲教遠被無思不洽爰暨
木居海處之酋被髮雕題之長莫不忘其陋險
九譯來庭此蓋播諸徽策靡究其詳者也曩者
永嘉不綱諸夏幅裂終古帝居淪胥戎虜永言
園陵率土同慕公明發遐慨撫機電征親董侯

伯稜威致討旗旒首塗則八表響震偏師先路
則多壘雲徹舊都載清五陵復禮百城屈膝千
落影從自篇籍所載生民以來勲德懋功未有
若此之盛者也昔周呂佐叡聖之主因三分之
形把旄仗鉞一時指麾皆大啓疆宇跨州兼國
其在桓文方茲尤儉然亦顯被寵章光錫殊品
况乃獨絕百代顧邈前烈者哉朕每弘鑒古訓
思遵令圖以公深秉冲挹用闕大禮天人引領
于茲歷載况今禹迹齊軌九澳同文司勳抗策

普天增佇遂公高挹大愆國章三靈眷屬朕實
祇懼便宜顯答羣望允崇盛典其進位相國摠
百揆揚州牧封十郡爲宋公備九錫之禮加璽
綬遠遊冠位在諸侯王上加相國綠綬綬策曰
朕以寡昧仰續洪基夷羿乘豐蕩覆王室越在
南鄙遷于九江宗祀絕饗人神無位提挈羣凶
寄命江滸則我祖宗之業奄墜于地七百之祚
翦焉旣傾若涉淵海罔知攸濟天未絕晉誕育
英輔振厥弛維再造區寓興亡繼絕俾昏作明

元勲至德朕實賴焉今將授公典策其敬聽朕
命乃者桓玄肆僭滔天浪夏拔本塞源顛倒六
位庶僚俛眉四方莫卹公精貫朝日氣凌霄漢
奮其靈武大殲群慝剋復皇邑奉帝歆神此公
之節始於勤王者也授律羣后沂流長驚薄伐
崢嶸獻捷南郢大憝折首羣逆畢夷三光旋采
舊物反正此又公之功也出藩入輔弘茲保弼
阜財利用繁殖生民編戶歲滋壇宇日啓導德
明刑四境有截此又公之功也鮮卑負衆僭盜
三齊狼噬冀青虔劉沂岱介恃遐阻仍爲邊害
公蒐乘秣駟襲入遠壘衝櫓四臨萬雉俱潰竊
號之虜顯戮司寇拓土三千申威龍漠此又公
之功也盧循妖凶伺隙五嶺乘虛肆逆侵覆江
豫旄拂寰內矢及王城朝野喪沮莫有固志家
獻徒卜之計國議遷都之規公乘轅南濟義形
于色巍然內湛視險若夷攄略運竒英謨不世
狡寇窮劔喪旗宵遁俾我畿甸拯於將墜此又
公之功也追奔逐北揚旌江濱偏旅浮海指日

遄至番禺之功俘級萬數左里之捷魚潰鳥散
元凶遠迸傳首萬里海南肅清荒服來欵此又
公之功也劉毅叛渙負豐西夏凌上罔主志肆
奸暴附麗協黨扇蕩王畿公御軌以刑消之不
日倉兇電泝神兵風掃罪人斯得荆衡清晏此
又公之功也譙縱怙亂寇竊一隅王化阻闕三
巴淪溺公指命偏師授以良圖凌波浮湍致屈
并絡僭豎伏鑕梁岷革偃此又公之功也馬休
魯宗阻兵內侮驅率二方連旗稱亂公投袂星

言斫其上略江津之師勢踰風電迴旆沔川寔
繁震懾二叛奔迸荆雍來蘇玄澤浸育溫風潛
被此又公之功也永嘉不競四夷擅華五都幅
裂山陵幽辱祖宗懷沒世之憤遺氓有匪風之
思公遠齊伊宰納隍之仁近同小白滅亡之恥
鞠旅陳師赫然大號分命羣帥北狗司究許鄭
風靡輦洛載清偽牧逆藩交臂請罪百年榛穢
一朝掃濟此又公之功也公有康宇內之勲重
之以明德爰初發迹則竒謨冠古電擊彊妖則

鋒無前對聿寧東畿大造黔首若乃草昧經綸
化融於歲計扶危靜亂道固於苞桑辯方正位
納之軌度蠲削煩苛較若畫一淳風美化盈塞
宇宙是以絕域獻琛遐夷納貢王略所宣九服
率從雖文命之東漸西被咎繇之邁于種德何
以尚茲朕聞先王之宰世也庸勲尊賢建侯胙
土褒以寵章崇其徽物所以協輔皇家永隆藩
屏故曲阜光啓遂荒徐宅營丘表海四履有聞
其在襄王亦賴匡霸又命晉文備物光錫惟公

道冠前烈勲高振古而殊典未加朕甚懼焉
進授相國以徐州之彭城沛蘭陵下邳淮陽山
陽廣陵兗州之高平魯泰山十郡封公爲宋公
錫茲玄土苴以白茅爰定爾居用建冢社昔晉
鄭啓藩入作卿士周邵保傳出惣二南內外之
重公實兼之命使持節太尉尚書左僕射晉寧
縣五等男湛授相國印綬宋公璽紱使持節兼
司空散騎常侍尚書陽遂鄉侯泰授宋公茅土
金虎符第一至第十左竹使符第一至第十左

相國位無不摠禮絕朝班居常之名宜與事革
其相國摠百揆去錄尚書之號上送所假節侍
中中外都督太傅太尉印綬豫章公印策進揚
州牧領征西將軍司豫北徐雍四州刺史如故
公紀綱禮度萬國是式秉介蹈方罔有遷志是
以錫公大輅戎輅各一玄牡二駟公抑末敦本
務農重積采繁寔殷稼穡惟阜是用錫公衮冕
之服赤舄副焉公閑邪納正移風改俗陶鈞品
物如樂之和是用錫公軒縣之樂六佾之舞八

宣美王化導揚休風華夷企踵遠人胥萃是用
錫公朱戶以居公官方任能網羅幽滯九臯辭
野髦士盈朝是用錫公納陛以登公當軸處中
率下以義式遏寇讎清除苛慝是用錫公虎賁
之士三百人公明罰恤刑庶獄詳允放命干紀
罔有攸縱是用錫公鈇鉞各一公龍驤鳳矯咫
尺八紘括囊四海折衝無外是用錫公彤弓一
彤矢百盧弓十盧矢千公溫恭孝思致虔禋祀
忠肅之志儀刑萬方是用錫公秬鬯一卣珪瓚

副焉宋國置丞相以下一尊舊儀欽哉其祗服
往命茂對天休簡恤庶邦敬敷顯德以終我高
祖之嘉命置宋國侍中黃門侍郎尚書左丞相
隨大使奉迎枹罕虜乞佛熾槃遣使詣公求効
力討羌拜平西將軍河南公十三年正月公以
舟師進討留彭城公諱鎮彭城軍次留城經張
良廟公曰夫盛德不泯義在祀典微管之歎撫
事彌深張子房道亞黃中照隣殆庶風雲玄感
蔚爲帝師大拯橫流夷項定漢固以參軌伊望

冠德如仁若乃神交圯上道契商洛顯晦之間
窈然難究源流淵浩莫測其端矣塗次舊沛佇
駕留城靈廟荒殘遺象陳昧撫迹懷人慨然永
歎過大梁者或佇想於夷門遊九原者亦流連
於隨會可改構榱桷修飾丹青蘋蘩行潦以時
致薦以紓懷古之情用存不刊之烈天子追贈
公祖爲太常父爲左光祿大夫讓不受二月冠
軍將軍檀道濟等次潼關三月庚辰大軍入河
索虜步騎十萬營據河津公命諸軍濟河擊破

之公至洛陽七月至陝城龍驤將軍王鎮惡伐木爲舟自河浮渭八月扶風太守沈田子大破姚泓於藍田王鎮惡尅長安生擒泓九月公至長安長安豐稔帑藏盈積公先收其彝器渾儀土圭之屬獻于京師其餘珍寶珠玉以班賜將帥執送姚泓斬于建康市謁漢高帝陵大會文武於未央殿十月天子詔曰朕聞先王之莅天下也上則大寶以尊德下則建侯以褒功是以成勲告就文命有玄圭之錫四海來王姬日饗

龜蒙之封夫翼聖宣績輔德弘猷禮窮元賞寵章希世况明保冲昧獨運陶鈞者哉朕以不德遭家多難雲雷作屯夷羿竊命失位京邑遂播蠻荆艱難卑約制命凶醜相國宋公天縱睿聖命世應期誠貫三靈大節宏發拯朕躬於巢幕迴靈命於已崩固已道窮北面暉格八表者矣及外積全國之勲內累戡黎之伐芟夷彊妖之始蘊崇奸猾之源顯仁藏用之道六府孔脩之績莫不雲行雨施能事畢舉諒已方軌於三五

不容於典策者焉自永嘉喪師綿踰十紀五都
分崩然正朔時暨唯三秦懸隔未之暫賓至今
羌虜襲亂淫雲三世資百二之易守恃函谷之
可關廟筭韜略不謀之日久矣公命世撫運闡
曜威靈內研諸侯之慮外致上天之罰故能倉
兕甫訓則許鄭風偃鉦鉞未指則灑洛霧披俾
舊闕元陽復集萬國之軫東京父老重覩司隸
之章俾朕負宸高拱而保大洪烈是用遠鑒前
典延即羣謀敬授殊錫光啓壇宇乘馬之制有
陋舊章微稱之美未窮上爵豈足以顯報懋功
允塞民望藩輔王畿長轡六合者乎寔以公每
秉謙德卑不可踰難進之道以寵爲戚是故降
損盛制且有後命也自茲迄今洪勳彌劭稜威
九河魏趙底服迴轅嶠潼連城冰泮遂長驅灞
澹懸於龍門逆虜姚泓係頸就擒百稔梗穢滌
於崇朝祖宗遺憤雪於一旦涉禹之迹方行天
下至于海外罔有不服功固萬世其寧惟永豈
金石雅頌所能讚揚寔可以告於神明勒銘嵩

岱者已朕又聞之周道方遠則鸞鷲鳴岐二南
播德則麟騶呈瑞自公大號初發爰暨告成靈
祥炳煥不可勝紀豈伊素雉遠至嘉禾近歸而
已哉朕每仰鑒玄應俯察人謀進惟道勲退惟
國典豈得遂公冲挹而久蘊盛策便宜敬行大
禮允副幽顯之望其進宋公爵爲王以徐州之
海陵東安北琅邪北東莞北東海北譙北梁豫
州之汝南北潁川北南頓凡十郡益宋國其相
國揚州牧領征西將軍司豫北徐雍四州刺史
如故十一月前將軍劉穆之卒以左司馬徐羨
之代掌留任大事昔所決於穆之者皆悉以諮
公欲息駕長安經略趙魏會穆之卒乃歸十二
月庚子發自長安以桂陽公義真爲安西將軍
雍州刺史留腹心將佐以輔之閏月公自洛入
河開汴渠以歸十四年正月壬戌公至彭城解
嚴息甲以輔國將軍劉遵考爲并州刺史領河
東太守鎮蒲坂公解司州領徐冀二州刺史固
讓進爵六月受相國宋公九錫之命令曰孤以

寡薄負荷殊重守位奉藩危溢是懼朝恩隆泰
委美推功遂方軌齊晉擬議國典雖亮誠守分
十稔于今而成命弗迴百辟胥暨內外庶僚敦
勉周至籍運來之功參休明之迹乘菲薄之資
同盛德之事監寐永言未知攸託隆祚之始思
覃斯慶其赦國內殊死以下今月二十三日昧
爽以前悉皆原宥鰥寡孤獨不能自存者人賜
粟五斛府州刑罪亦同蕩然其餘詳依舊準詔
崇豫章公太夫人爲宋公太妃世子爲中軍將
軍副貳相國府以太尉軍諮祭酒孔季恭爲宋
國尚書令青州刺史檀祗爲領軍將軍相國左
長史王弘爲尚書僕射其餘百官悉依天朝之
制又詔宋國所封十郡之外悉得除用先是安
西中兵參軍沈田子殺安西司馬王鎮惡諸將
軍復殺安西長史王脩關中亂十月公遣右將
軍朱齡石代安西將軍桂陽公義直爲雍州刺
史義真旣還爲佛佛虜所追大敗僅以身免諸
將帥及齡石竝沒領軍檀祗卒以中軍司馬檀

道濟爲中領軍十二月天子崩大司馬琅琊王
即帝位

元熙元年正月詔遣大使徵公入輔又申前命
進公爵爲王以徐州之海陵東海北譙北梁豫
州之新蔡兗州之北陳留司州之陳郡汝南潁
州滎陽十郡增宋國七月乃受命赦國內五歲
刑以下遷都壽陽以尚書劉懷慎爲北徐州刺
史鎮彭城九月解揚州十二月天子命王冕十
有二旒建天子旌旗出警入蹕乘金根車駕六
馬備五時副車置旄頭雲罕雜舞八佾設鐘簋
宮縣進王太妃爲太后王妃爲王后世子爲太
子王子王孫爵命之號一如舊儀

二年四月徵王入輔六月至京師晉帝禪位於
王詔曰夫天造草昧樹之司牧所以陶鈞三極
統天施化故大道之行選賢與能隆替無常期
禪代非一族貫之百王由來尚矣晉道陵遲仍
世多故爰暨元興禍難旣積至三光貿位冠履
易所安皇播越宗祀墮泯躬我宣元之祚永隆

于地顧瞻區域翦焉已傾相國宋王天縱聖德
靈武秀世一匡頽運再造區夏固以興滅繼絕
舟航淪溺矣若夫仰在璿璣旁穆七政薄伐不
庭開復壇宇遂乃三俘僞主開滌五都雕顏卉
服之鄉龍荒朔漠之長莫不迴首朝陽沐浴玄
澤故四靈效瑞川岳啓圖嘉祥雜遝休應炳著
玄象表革命之期華裔注樂推之願代德之符
著乎幽顯瞻烏爰止允集明哲夫豈延康有歸
咸熙告謝而已哉昔火德旣微魏祖底績黃運

不競三后肆勤故天之曆數寔有攸在朕雖庸
闇昧於大道永鑒廢興爲日已久念四代之高
義稽天人之至望予其遜位別宮歸禪于宋一
依唐虞漢魏故事詔草旣成送呈天子使書之
天子卽便操筆謂左右曰桓玄之時天命已改
重爲劉公所延將二十載今日之事本所甘心
甲子策曰咨爾宋王夫玄古權輿悠哉邈矣其
詳靡得而聞爰自書契降逮三五莫不以上聖
君四海止戈定大業然則帝王者宰物之通器

君道者天下之至公昔在上葉深鑒茲道是以
天祿既終唐虞弗得傳其嗣符命來格舜禹不
獲全其謙所以經緯三才澄序彝化作範振古
垂風萬葉莫尚於茲自是厥後歷代彌劭漢既
嗣德於放勛魏亦方軌於重華諒以協謀乎人
鬼而以百姓爲心者也昔我祖宗欽明辰居其
極而明晦代序盈虧有期翦商兆禍非唯一世
曾是弗尅矧伊在今天之所廢有自來矣惟王
體上聖之姿苞上儀之德明齊日月道合四時

乃者社稷傾覆王拯而存之中原蕪梗又濟而
復之自負固不賓于紀放命肆逆滔天竊據萬
里靡不潤之以風雨震之以雷霆九伐之道既
敷八法之化自理豈伊博施於民濟斯黔庶固
以義洽四海道威八荒者矣至於上天垂象四
靈效徵圖讖之文旣明人神之望已改百工歌
於朝庶民頌於野億兆抃踊傾佇惟新自非百
姓樂推天命攸集豈伊在予所得獨專是用仰
祇皇靈俯順羣議敬禪神器授帝位于爾躬大

禘告窮天祿永終於戲王其允執其中敬遵典
訓副率土之嘉願恢洪業於無窮時膺休祐以
答三靈之眷望又璽書曰蓋聞天生蒸民樹之
以君帝皇寄世實公四海崇替係於勲德升降
存乎其人故有國必亡十年著其數代謝無常
聖哲握其符昔在上世三聖係軌疇咨四嶽以
弘揖讓惟先王之有作永垂範於無窮及劉氏
致禪寔堯是法有魏告終亦憲茲典與我世祖所
以無歸運而順人事乘利見而定天保者也而
道不常泰戎夷亂華喪我洛京蹙國江表仍遭
否運淪沒相因逮于元興遂傾宗祀幸賴神武
光天大節宏發匡復我社稷重造我國家惟王
聖德欽明則天光大應期誕載明保王室內紆
國難外播宏略誅大憝於漢陽逋僭盜於沂渚
澄氛西岷肅清南越再靜江湘拓定樊沔若乃
永懷區宇思一聲教王師首路則伊洛澄流稜
威嶠潼則華嶽寒靄偽酋銜璧咸陽即序雖葵
器所銘詩書所詠庸勳之盛莫之與二也遂偃

武脩文誕敷德政八統以馭萬民九職以刑邦
國思兼三王以施四事故能信著幽顯義感殊
方自歷世所賓舟車所暨靡不謳歌仁德抃舞
來庭朕每敬惟道勲永察符運天之曆數實在
爾躬是以五緯升度屢示除舊之迹三光協數
必昭布新之祥圖讖禎瑞皎然斯在加以龍顏
英特天授殊姿君人之表煥如日月傳稱惟天
爲大惟堯則之詩云有命自天命此文王夫或
躍在淵者終饗九五之位勲格天地者必膺大
寶之業昔土德告泯傳胙于我有晉今曆運改
卜永終于茲亦以金德而傳于宋仰四代之休
義鑒明昏之定期詢于羣公爰逮庶尹咸曰休
哉罔違朕志今遣使持節兼太保散騎常侍光
祿大夫澹兼太尉尚書宣範奉皇帝璽綬受終
之禮一如唐虞漢魏故事王其允荅人神君臨
萬國時膺靈祉酬于上天之眷命王奉表陳讓
晉帝已遜琅邪王第表不獲通於是陳留王度
嗣等二百七十人及宋臺羣臣竝上表勸進上

猶不許太史令駱達陳天文符瑞數十條群臣
又固請王乃從之

同日校正八字補一字 夢禎識

本紀第二

宋書二

本紀第三

宋書三

臣沈約新撰

武帝下

永初元年夏六月丁卯設壇於南郊即皇帝位
柴燎告天策曰皇帝臣諱敢用玄牡昭告皇天
后帝晉帝以上世告終曆數有歸欽若景運以
命于諱夫樹君宰世天下為公德充帝王樂推
攸集越俶唐虞降暨漢魏靡不以上哲格文祖
元勳陟帝位故能大拯黔首垂訓無窮晉自東

遷四維不振宰輔憑依爲日已久難棘隆安禍
成元興遂至帝主遷播宗祀堙滅諱雖地非齊
晉衆無一旅仰憤時難俯悼橫流投袂一援則
皇祀克復及危而能持顛而能扶姦宄具殲僭
僞必滅誠興廢有期否終有數至於大造晉室
撥亂濟民因藉時來實尸其重加以殊俗慕義
重譯來庭正朔所暨咸服聲教至乃三靈垂象
山川告祥人神協祉歲月滋著是以羣公卿士
億兆夷人僉曰皇靈降鑒於上晉朝誠於下

天命不可以久淹宸極不可以暫曠遂逼羣議
恭茲大禮猥以寡德託於兆民之上雖仰畏天
威略是小節顧探永懷祇懼若賈敬簡元辰升
壇受禪告類上帝用酬萬國之情克隆天保永
祚于有宋惟明靈是變禮畢備法駕幸建康宮
臨太極前殿詔曰夫世代迭興承天統極雖遭
遇異塗因革殊事若乃功濟區宇道振生民興
廢所階異世一揆朕以寡薄屬當艱運籍否終
之期因士民之力用獲拯溺匡世撥亂安國寧

民業未半古功參曩烈晉氏以多難仍邁曆運
已移欽若前王憲章令軌用集大命于朕躬惟
德匪嗣辭不獲申遂祗順三靈饗茲景祚燔柴
于南郊受終于文祖猥當與能之期爰集樂推
之運嘉祚肇開隆慶惟始思俾休嘉惠茲兆庶
其大赦天下改晉元熙二年爲永初元年賜民
爵二級鰥寡孤獨不能自存者人穀五斛逋租
宿債勿復收其有犯鄉論清議贓汙淫盜一皆
蕩滌洗除與之更始長徒之身特皆原遣亡官

失爵禁錮奪勞一依舊準封晉帝爲零陵王令
食一郡載天子旌旗乘五時副車行晉正朔郊
祀天地禮樂制度皆用晉典上書不爲表荅表
勿稱詔追尊皇考爲孝穆皇帝皇妣爲穆皇后
尊王太后爲皇太后詔曰夫微禹之感歎深後
昆盛德必祀道隆百世晉氏封爵咸隨運改至
於德參微管勲濟蒼生愛人懷樹猶或勿翦雖
在異代義無泯絕降殺之儀一依前典可降始
興公封始興縣公廬陵公封柴桑縣公各千戶

始安公封荔浦縣侯長沙公封醴陵縣侯康樂
公可即封縣侯各五百戶以奉晉故丞相王導
太傅謝安大將軍溫嶠大司馬陶侃車騎將軍
謝玄之祀其宣力義熙豫同艱難者一依本秩無
所減降封晉臨川王司馬寶爲西豐縣侯食邑
千戶庚午以司空道憐爲太尉封長沙王追封
司徒道規爲臨川王尚書僕射徐羨之加鎮軍
將軍右衛將軍謝晦爲中領軍宋國領軍檀道
濟爲護軍將軍中領軍劉義欣爲青州刺史立

南郡公義慶爲臨川王又詔曰夫銘功紀勞有
國之要典慎終追舊在心之所隆自大業創基
十有七載世路迍邐戎車歲動自東徂西靡有
寧日實賴將帥竭心文武盡効寧內拓外迄用
有成威靈遠著寇逆消蕩遂當揖讓之禮猥饗
天人之祚念功簡勞無忘鑒寐凡厥誠勤宜同
國慶其酬賞復除之科以時論舉戰亡之身厚
加復贈乙亥立桂陽公義真爲廬陵王彭城公
諱爲宜都王第四皇子義康爲彭城王丁丑詔

曰古之王者巡狩省方躬覽民物搜揚幽隱拯
災卹患用能風澤遐被遠至邇安朕以寡聞道
謝前哲因受終之期託兆庶之上鑒寐屬慮思
求民瘼才弱事艱苦無津濟夕惕永念心馳遐
域可遣大使分行四方旌賢舉善問所疾苦其
有獄訟虧濫政刑乖愆傷化擾治未允民聽者
皆當具以事聞萬事之宜無失厥中暢朝廷乃
眷之旨宣下民壅隔之情戊寅詔曰百官事殷
俸薄祿不代耕雖國儲未豐要令公私周濟諸

供納昔減半者可悉復舊六軍見祿粗可不在
此例其餘官寮或自本俸素少者亦疇量增之
已卯改晉泰始曆爲永初曆秋七月丁亥原放
劫賊餘口没在臺府者諸徙家竝聽還本邑運
舟材及運船不復下諸郡輸出悉委都水別量
臺府所須皆別遣主帥與民和市即時裨直不
復責租民求辦又停廢虜車牛不得以官威假
借又以市稅繁苦優量減降從征關洛殞身戰
場幽沒不反者贍賜其家己丑陳留王曹虔嗣

薨辛卯復置五校三將官增殿中將軍員二十
人餘在員外戊戌後將軍雍州刺史趙倫之進
號安北將軍征虜將軍北徐州刺史劉懷慎進
號平北將軍征西大將軍開府儀同三司楊盛
進號車騎大將軍甲辰鎮西將軍李歆進號征
西將軍平西將軍乞佛熾槃進號安西大將軍
征東將軍高句驪王高璉進號征東大將軍鎮
東將軍百濟王扶餘暎進號鎮東大將軍置東
宮冗從僕射旅賁中郎將官戊申遷神主於太
廟車駕親奉壬子詔曰往者軍國務殷事有權
制劫科峻重施之一時今王道維新政和法簡
可一除之還遵舊條反叛淫盜三犯補治士本
謂一事三犯終無悛革主者頃多并數眾事合
而為三甚違立制之旨普更申明八月戊午西
中郎將荊州刺史宜都王諱進號鎮西將軍辛
酉開亡叛赦限內首出蠲租布二年先有資狀
黃籍猶存者聽復本注諸舊郡縣以北為名者
悉除寓立於南者聽以南為號又制有無故自

殘傷者補治士實由政刑煩苛民不堪命可除
此條罷青州并兗州戊辰詔曰彭沛下邳三郡
首事所基情義繾綣事由情獎古今所同彭城
桑梓本鄉加隆攸在優復之制宜同豐沛其沛
郡下邳可復租布三十年辛未追謚妃臧氏爲
敬皇后癸酉立王太子爲皇太子乙亥詔曰朕
承曆受終猥饗天命荷積善之祚藉士民之力
率由令範先后祇嚴宣訓七廟肇建情敬無違
加以儲宮備禮皇基彌固國慶家禮爰集旬日
豈予一人獨荷茲慶其見刑罪無輕重可悉原
赦限百日以今爲始先因軍事所發奴僮各還
本土若死亡及勲勞破免亦依限還直閏月壬
午朔詔曰晉世帝后及藩王諸陵守衛宜便置
格其名賢先哲見優前代或立德著節或寧亂
庇民墳塋未遠竝宜洒掃主者具條以聞丁酉
特進左光祿大夫孔季恭加開府儀同三司辛
丑詔曰主者處案雖多所諮詳若衆官命議宜
令明審自頃或總稱參詳於文漫略自今有厝

意者皆當指名其所見不同依舊繼啓又詔
曰諸處冬使或遣或不事役宜省可悉停唯元
正大慶不在其例郡縣遣冬使詣州及都督府
亦停之九月壬子朔置東宮殿中將軍十人員
外二十人壬申置都官尚書冬十月辛卯改晉
所用王肅祥禫二十六月儀依鄭玄二十七月
而後除十二月辛巳朔車駕臨延賢堂聽訟
二年春正月辛酉車駕祠南郊大赦天下丙寅
斷金銀塗以揚州刺史廬陵王義真爲司徒以

尚書僕射鎮軍將軍徐羨之爲尚書令揚州刺
史丙子南康揭陽蠻反郡縣討破之己卯禁喪
事用銅釘罷會稽郡府二月己丑車駕幸延賢
堂策試諸州郡秀才孝廉揚州秀才顧練豫州
秀才殷朗所對稱旨竝以爲著作佐郎戊申制
中二千石加公田一頃三月乙丑初限荊州府
置將不得過二千人吏不得過一萬人州置將
不得過五百人吏不得過五千人兵士不在此
限夏四月己卯朔詔曰淫祠惑民費財前典所

絕可竝下在所除諸房廟其先賢及以勳德立
祠者不在此例戊申車駕於華林園聽訟己亥
以左衛將軍王仲德爲冀州刺史五月己酉置
東宮屯騎步兵翊軍三校尉官甲戌車駕又幸
華林園聽訟六月壬寅詔曰杖罰雖有舊科然
職務殷碎推坐相尋若皆有其實則體所不堪
文行而已又非設罰之意可籌量痛爲中否之
格車駕又於華林園聽訟甲辰制諸署敕吏四
品以下又府署所得輒罰者聽統府寺行四十

杖秋七月己巳地震八月壬辰車駕又於華林
園聽訟九月己丑零陵王薨車駕三朝率百僚
舉哀于朝堂一依魏明帝服山陽公故事太尉
持節監護葬以晉禮冬十月丁酉詔曰兵制峻
重務在得宜後身死叛輒考傍親流遷彌廣未
見其極遂令冠帶之倫淪陷非所宜革以弘泰
去其密科自今犯罪充兵合舉戶從役者便付
營押領其有戶統及謫止一身者不得復侵濫
服親以相傳染己亥以涼州胡大帥沮渠蒙遜

爲鎮軍大將軍開府儀同三司涼州刺史癸卯
車駕於延賢堂聽訟以員外散騎常侍應襲爲
寧州刺史

三年春正月甲辰朔詔刑罰無輕重悉皆原降
壬子以前冀州刺史王仲德爲徐州刺史癸丑
以尚書令揚州刺史徐羨之爲司空錄尚書事
刺史如故撫軍將軍江州刺史王弘進號衛將
軍開府儀同三司太子詹事傅亮爲尚書僕射
中領軍謝莊爲領軍將軍乙卯以輔國將軍毛

德爲司州刺史乙丑詔曰古之建國教學爲先
弘風訓世莫尚於此發蒙啓滯咸必由之故爰
自盛王迄于近代莫不敦崇學藝脩建庠序自
昔多故戎馬在郊旌旗卷舒日不暇給遂令學
校荒廢講誦蔑聞軍旅日陳俎豆藏器訓誘之
風將墜于地後生大懼於墻面故老竊歎於子
衿此國風所以永思小雅所以懷古今王略遠
屆華域載清仰風之士日月以冀便宜博延胄
子陶獎童蒙選備儒官弘振國學主者考詳舊

史記卷三十一
與以時施行二月丁丑詔曰豫州南臨江潁北
接河洛民荒境曠轉輸艱遠撫莅之宜各有其
便淮西諸郡可立爲豫州自淮以東爲南豫州
以豫州刺史彭城王義康爲南豫州刺史征虜
將軍劉粹爲豫州刺史又分荊州十郡還立湘
州左衛將軍張紀爲湘州刺史戊寅以徐州之
梁還屬豫州三月上不豫太尉長沙王道憐司
空徐羨之尚書僕射傅亮領軍將軍謝晦護軍
將軍檀道濟竝入侍醫藥群臣請祈禱神祇上

不許唯使侍中謝方明以疾告廟而已丁未以
司徒廬陵王義真爲車騎將軍開府儀同三司
南豫州刺史上疾瘳己未大赦天下時秦雖流
戶悉南入梁州庚申送綜絹萬匹荆雖州運米
委州刺史隨宜賦給辛酉亡命刁彌攻京城得
入太尉留府司馬陸仲元討斬之夏四月乙亥
封仇池公楊威爲武都王平南將軍楊撫進號
安南將軍丁亥以車騎司馬徐琰爲兖州刺史
庚寅左光祿大夫開府儀同三司孔季恭薨五

宋書卷之三十一
月上疾甚召太子誡之曰檀道濟雖有幹略而無遠志非如兄詔有難御之氣也徐羨之傅亮當無異圖謝晦數從征伐頗識機變若有同異必此人也小郤可以會稽江州處之又爲手詔曰朝廷不須復有別府宰相帶揚州可置甲士千人若大臣中任要宜有爪牙以備不祥人者可以臺見隊給之有征討悉配以臺見軍隊行還復舊後世若有幼主朝事一委宰相毋后不煩臨朝仗旣不許入臺殿門要重人可詳給班劍

癸亥上崩于西殿時年六十七秋七月己酉葬丹陽建康縣蔣山初寧陵上清簡寡欲嚴整有法度未嘗視珠玉輿馬之飾後庭無紈綺絲竹之音寧州嘗獻虎魄枕光色甚麗時將北征以虎魄冶金創上大悅命擣碎分付諸將平關中得姚興從女有盛寵以之廢事謝晦諫即時遣出財帛皆在外府內無私藏宋臺旣建有司奏東西堂施局脚牀銀塗釘上不許使用直脚牀釘用鐵諸主出適遣送不過二十萬無錦繡金

玉內外奉禁莫不節儉性尤簡易常著連齒木
屐好出神虎門逍遙左右從者不過十餘人時
徐羨之住西州嘗幸羨之便步出西掖門羽儀
絡繹追隨已出西明門矣諸子旦問起居入閣
脫公服止著裙帽如家人之禮孝武大明中壞
上所居陰室於其處起玉燭殿與羣臣觀之牀
頭有土鄣壁上葛燈籠麻繩拂侍中袁顛盛稱
上儉素之德孝武不荅獨曰田舍公得此以爲
過矣故能光有天下克成大業者焉

史臣曰漢氏載祀四百比胙隆周雖復四海橫
潰而民繫劉氏慄慄黔首未有遷奉之心魏武
直以兵威服衆故能坐移天曆鼎運雖改而民
未忘漢及魏室衰孤怨非結下晉藉宰輔之柄
因皇族之微世擅重權用基王業至於宋祖受
命義越前模晉自社廟南遷祿去土室朝權國
命遞歸台輔君道雖存主威久謝桓溫雄才蓋
世勤高一時移鼎之業已成天人之望將改自
斯以後晉道彌昏道子開其禍端元顯成其釁

宋書紀卷三
末桓玄藉運乘時加以先父之業因基革命人
無異心高祖地非桓文衆無一旅曾不浹旬夷
凶翦暴祀晉配天不失舊物誅內清外功格區
宇至於鍾石變聲柴天改物民已去晉異於延
康之初功實靜亂又殊咸熙之末所以恭皇高
遜殆均釋負若夫樂推所歸謳歌所集魏晉采
其名高祖收其實矣盛哉

初四日校正七字補一字 夢偵識

本紀第三

宋書三

本紀第四

宋書四

臣沈約新撰

少帝

少帝諱義符小字車兵武帝長子也母曰張夫
人晉義熙二年生於京口武帝晚無男及帝生
甚悅年十歲拜豫章公世子帝有旅力善騎射
解音律宋臺建拜宋世子元熙元年進爲宋太
子武帝受禪立爲皇太子永初三年五月癸亥
武帝崩是日太子即皇帝位大赦尊皇太后曰

太皇太后六月壬申以尚書僕射傅亮爲中書
監司空徐羨之領軍將軍謝晦及亮輔政戊子
太尉長沙王道憐薨秋九月丁未有司奏武皇
帝配南郊武敬皇后配北郊冬十一月戊午有
星孛于營室十二月庚戌魏軍克滑臺明年春
正月己亥朔大赦改元爲景平元年文武進位
二等辛巳祀南郊虜將達奚卬破金墉進圍虎
牢毛德祖擊虜敗之虜退而復合拓跋木末又
遣平安公涉歸寇青州癸卯河南郡失守乙卯

有星孛于東壁二月丁丑太皇太后崩沮渠蒙
遜土谷渾阿豺竝遣使朝貢庚辰爵蒙遜爲大
將軍封河西王以阿豺爲安西將軍沙州刺史
封澆河公辛未富陽人孫法光反寇山陰會稽
太守褚談遣山陰令陸劭討敗之三月壬寅孝
懿皇后祔葬于興寧陵是月高麗國遣使朝貢
甲子豫州刺史劉粹遣軍襲許昌殺虜潁州太
守庾龍乙丑虜騎寇高平初虜自河北之敗請
修和親及聞高祖崩因復侵擾河洛之地騷然

矣夏四月檀道濟北征次臨朐焚虜攻具乙未
魏軍克虎牢執司州刺史毛德祖以歸秋七月
癸酉尊所生張夫人爲皇太后丁丑以旱詔赦
五歲以下罪人冬十月己未有星孛于氏指尾
貫攝提向大角仲月在危季月掃天倉而後滅
是歲魏主拓跋嗣薨子燾立十二月丙寅省寧
州之江陽犍爲安上三郡合爲宋昌郡

二年春正月癸巳朔日有蝕之廢南豫州刺史
廬陵王義真爲庶人徙新安郡乙未以皇弟義

恭爲冠軍將軍南豫州刺史乙巳大風天有五
色雲占者以爲有兵高麗國遣使貢獻執政使
使者誅義真于新安夏五月江州刺史檀道濟
揚州刺史王弘入朝帝居處所爲多過失乙酉
皇太后令曰王室不造天禍未悔先帝創業弗
永棄世登遐義符長嗣屬當天位不謂窮凶極
悖一至於此大行在殯宇內哀惶幸災肆於悖
詞喜容表於在感至乃徵召樂府鳩集伶官優
倡管絃靡不備奏珍羞甘膳有加平日採擇媵

御產子就宮覩然無怍醜聲四達及懿后崩背
重加天罰親與左右執紼歌呼推排梓宮抃掌
笑謔殿省備聞加復日夜媠狎羣小慢戲興造
千計費用萬端帑藏空虛人力殫盡刑罰苛虐
幽囚日增居帝王之位好皂隸之役處萬乘之
尊悅廝養之事親執鞭撲毆擊無辜以爲笑樂
穿池築觀朝成暮毀徵發工匠疲極兆民遠近
歎嗟人神怨怒社稷將墜豈可復嗣守洪業君
臨萬邦今廢爲滎陽王一依漢昌邑晉海西故

事奉迎鎮西將軍宜都王義隆入纂皇統始徐
羨之傅亮將廢帝諷王弘檀道濟求赴國計弘
等來朝使中書舍人邢安泰潘盛爲內應是旦
道濟謝晦領兵居前羨之等隨後因東掖門開
入自雲龍門盛等先戒宿衛莫有禦者時帝於
華林園爲列肆親自酤賣又開瀆聚土以象破
岡埭與左右引船唱呼以爲歡樂夕游天泉池
即龍舟而寢其朝未興兵士進殺二侍者於帝
側傷帝指扶出東閣就收璽紱群臣拜辭送于

東宮遂幽于吳郡是日赦死罪以下太后令奉
還璽綬檀道濟入守朝堂六月癸丑徐羨之等
使中書舍人邢安泰弑帝於金昌亭帝有勇力
不即受制突走出昌門追以門關路之致殞時
年十九

本紀第四

宋書四

本紀第五

宋書五

臣沈約新撰

文帝

太祖文皇帝諱義隆小字車兒武帝第三子也
晉安帝義熙三年生於京口盧循之難上年四
歲高祖使諮議參軍劉粹輔上鎮京城十一年
封彭城縣公高祖伐羌至彭城將進路板上行
冠軍將軍留守晉朝加授使持節監徐兗青冀
四州諸軍事徐州刺史將軍如故關中平定高

祖還彭城又授監司州豫州之淮西兗州之陳
留諸軍事前將軍司州刺史持節如故將鎮洛
陽仍改授都督荆益寧雍梁秦六州豫州之河
南廣平揚州之義成松滋四郡諸軍事西中郎
將荊州刺史持節如故永初元年封宜都王食
邑三千戶進督北秦并前七州進號鎮西將軍
給鼓吹一部又進督湘州是歲入朝時年十四
長七尺五寸博涉經史善隸書景平二年七月
中少帝廢百官備法駕奉迎入奉皇統行臺至

江陵進璽紱侍中臣琇散騎常侍臣疑之中書
監尚書令護軍將軍建城縣公臣亮左衛將軍
臣景仁給事中游擊將軍龍鄉縣侯臣隆越騎
校尉都亭侯臣綱給事黃門侍郎臣孔璩之散
騎侍郎臣劉思考員外散騎侍郎臣潘盛中書
侍郎臣何尚之羽林監封陽縣侯臣蕭思
話長兼尚書左丞德陽縣侯臣孫康吏部郎中
騎都尉臣張茂度儀曹郎中臣徐長琳倉部郎
中臣庾俊之都官郎中臣袁洵等上表曰臣聞


否泰相革數窮則變天道所以不諂卜世所以
 靈長乃者運距陵夷王室艱晦九服之命靡所
 適歸高祖之業將墜于地賴基厚德深人神同
 獎社稷以寧有生獲又伏惟陛下君德自然聖
 明在御孝悌著於家邦風猷宣於蕃牧是以徵
 祥雜沓符瑞燿輝宗廟神靈乃睠西顧萬邦黎
 獻望景託生臣等忝荷朝列豫充將命復集休
 明之運再覩太平之業行臺至止瞻望城闕不
 勝喜悅鳧藻之情謹詣門拜表以聞上荅曰皇
 運艱弊數鍾屯夷仰惟崇基感尋國故永慕厥
 躬悲慨交集賴七百祚永股肱忠賢故能休否
 以泰天人式序猥以不德謬降大命顧已兢悸
 何以克堪輒當暫歸朝廷展哀陵寢并與賢彥
 申寫所懷望體其心勿為辭費府州佐史竝稱
 臣請題榜諸門一依宮省上不許甲戌發江陵
 八月丙申車駕至京城丁酉謁初寧陵還於中
 堂即皇帝位

元嘉元年秋八月丁酉大赦天下改景平二年

爲元嘉元年文武賜位二等逋租宿債勿復收
庚子以行撫軍將軍荊州刺史謝晦爲撫軍將
軍荊州刺史癸卯司空錄尚書事揚州刺史徐
羨之進位司徒衛將軍江州刺史王弘進位司
空中書監護軍將軍傅亮加左光祿大夫開府
儀同三司撫軍將軍荊州刺史謝晦進號衛將
軍鎮北將軍南兖州刺史檀道濟進號征北將
軍甲辰追尊所生胡婕妤爲皇太后謚曰章后
衛將軍南徐州刺史彭城王義康進號驃騎將
軍冠軍將軍南豫州刺史義恭進號撫軍將軍
封江夏王立第六皇弟義宣爲竟陵王第七皇
弟義季爲衡陽王戊申以豫州刺史劉粹爲雍
州刺史驍騎將軍管義之爲豫州刺史南蠻校
尉到彥之爲中領軍己酉減荆湘二州今年稅
布之半九月丙子立妃袁氏爲皇后
二年春正月丙寅司徒徐羨之尚書令傅亮奉
表歸政上始親覽車駕祠南郊大赦天下三月
乙丑左將軍徐州刺史王仲德進號安北將軍

夏五月戊寅特進謝澹卒秋八月甲申以關中
 流民出漢川置京兆扶風馮翊等郡乙酉驃騎
 將軍南徐州刺史彭城王義康為開府儀同三
 司新除司空王弘為車騎大將軍開府儀同三
 司以右軍長史江恒為廣州刺史冬十一月癸
 酉以前將軍楊玄為征西將軍北秦州刺史
 三年春正月丙寅司徒錄尚書事揚州刺史徐
 羨之尚書令護軍將軍左光祿大夫傅亮有罪
 伏誅遣中領軍到彦之征北將軍檀道濟討荆
 州刺史謝晦上親率六師西征大赦天下丁卯

以車騎大將軍江州刺史王弘為司徒錄尚書
 事揚州刺史驃騎將軍南徐州刺史彭城王義
 康改為荊州刺史撫軍將軍南豫州刺史江夏
 王義恭改為南徐州刺史己巳以前護軍將軍
 趙倫之為鎮軍將軍閏月丙戌皇子劭生二月
 乙卯繫囚見徒一皆原赦戊午以金紫光祿大
 夫王敬弘為尚書左僕射豫章太守鄭鮮之為
 尚書右僕射建安太守潘城有罪伏誅庚申特



進范泰加光祿大夫是日車駕發京師戊辰到
彥之檀道濟大破謝晦於隱磯丙子車駕自蕪
湖反旆己卯擒晦於延頭送京師伏誅三月辛
巳車駕還宮夏五月乙未以征北將軍南兖州
刺史檀道濟爲征南大將軍江州刺史中領軍
到彥之爲南豫州刺史戊戌以後將軍長沙王
義欣爲南兖州刺史乙巳驃騎大將軍涼州牧
大沮渠蒙遜改爲車騎大將軍詔曰夫哲王宰
世廣達四聰猶巡獄省方採風觀政所以情僞

必審幽遐罔滯王澤無擁九皇有聞者也朕以
寡薄猥纘洪緒雖永念治道志存昧旦願言傳
巖發想宵寐而丘園之秀藏器未臻物情民隱
尚隔視聽乃眷區域輟寢忘食今氛祲驅蕩宇
內寧晏旌賢弘化於是乎始可遣大使巡行四
方其宰守稱職之良閭閻一介之善詳悉列奏
勿或有遺若刑獄不卹政治乖謬傷民害教者
具以事聞其高年鰥寡幼孤六疾不能自存者
可與郡縣優量賑給博採輿誦廣納嘉謀務盡

銜命之旨俾若朕親覽焉丙午車駕臨延賢堂
聽訟六月己未以鎮軍將軍趙倫之爲左光祿
大夫領軍將軍丙寅車駕又於延賢堂聽訟丙
子又聽訟以右衛王華爲中護軍冬十一月戊
寅以梁南秦二州刺史吉翰爲益州刺史驃騎
參軍劉道產爲梁南秦二州刺史己亥以南蠻
校尉劉遵考爲雍州刺史十二月癸丑以中書
侍郎蕭思話爲青州刺史壬戌前吳郡太守徐
佩之謀反及黨與皆伏誅

四年春正月乙亥朔曲赦都邑百里內辛巳車
駕親祠南郊二月乙卯行幸丹徒謁京陵三月
丙子詔曰丹徒桑梓綢繆大業攸始踐境永懷
觸感罔極昔漢章南巡加恩元氏况情義二三
有兼曩日思播遺澤酬慰士民其蠲此縣今年
租布五歲刑以下皆悉原遣登城三戰及大將
家隨宜隱卹丁亥車駕還宮戊子尚書右僕射
鄭鮮之卒壬寅禁斷夏至日五絲命縷之屬富
陽令諸葛闡之之議也夏四月庚戌以廷尉王

徽之爲交州刺史五月壬午中護軍王華卒京師疾疫甲午遣使存問給醫藥死者若無家屬賜以棺器六月癸卯朔日有蝕之庚申以金紫光祿大夫殷穆爲護軍將軍

五年春正月乙亥詔曰朕恭承洪業臨饗四海風化未弘治道多昧求之人事鑿寐惟憂加頃陰陽違序旱疫成患仰惟災戒責深在予思所以側身尅念議獄詳刑上荅天譴下恤民瘼羣后百司其各獻讜言指陳得失勿有所諱甲申

車駕臨玄武館閱武戊子京邑大火遣使巡慰賑賜夏四月己亥以南蠻校尉蕭摹之爲湘州刺史戊午以始興太守徐諮爲廣州刺史五月己卯以湘州刺史張邵爲雍州刺史六月庚戌司徒王弘降爲衛將軍開府儀同三司京邑大水己卯遣使檢行賑贍以江夏內史程道惠爲廣州刺史秋八月壬戌特進左光祿大夫范泰卒冬十月甲辰車駕於延賢堂聽訟閏月癸未以右軍司馬劉德武爲豫州刺史辛卯安陸公

宋書紀卷五
相周籍之爲寧州刺史十二月庚寅左光祿大夫領軍將軍趙倫之卒是歲天竺國遣使貢獻方物

六年春正月辛丑車駕親祠南郊癸丑以驃騎將軍荊州刺史彭城王義康爲司徒錄尚書事領平北將軍徐州刺史三月丁巳立皇子劭爲皇太子戊午大赦天下賜文武位一等辛酉以左衛將軍殷景仁爲中領軍夏四月癸亥以尚書左僕射王敬弘爲尚書令丹陽尹臨川王義

慶爲尚書左僕射吏部尚書江夷爲尚書右僕射五月壬辰朔日有蝕之癸巳以新除尚書令王敬弘爲特進左光祿大夫甲午以撫軍司馬劉道濟爲益州刺史乙卯於雍州置馮翊郡七月己酉以尚書左丞孔默之爲廣州刺史是月百濟王遣使獻方物九月戊午於秦州置隴西宋康二郡冬十月壬申中領軍殷景仁丁艱去職十一月己丑朔日有蝕之十二月丁亥河南國西河王遣使獻方物

七年春正月癸巳以吐谷渾慕容瓚爲征西將軍沙州刺史是月倭國王遣使獻方物三月戊子遣右將軍到彥之北伐水軍入河甲午以前征虜司馬冲爲司州刺史甲寅以前中領軍殷景仁爲領軍將軍夏四月癸未訶羅單國遣使獻方物六月己卯以冠軍將軍氏楊難當爲秦州刺史秋七月戊子索虜碯碯戍棄城走丙申以平北諮議參軍甄法護爲梁南秦二州刺史戊戌索虜滑臺戍棄城走甲寅林邑國訶羅佗國師子國遣使獻方物冬十月甲寅罷南豫州并豫州以左將軍竟陵王義宣爲徐州刺史戊午立錢署鑄四銖錢戊寅金墉城爲索虜所陷十一月癸未虎牢城復爲索虜所陷壬辰遣征南大將軍檀道濟北討右將軍到彥之自滑臺奔退十二月辛酉以南兖州刺史長沙王義欣爲豫州刺史司徒司馬吉翰爲司州刺史乙亥京邑火延燒太社北墻兖州刺史竺靈秀有罪伏誅

八年春正月庚寅於交州復立珠崖郡癸巳以
左軍將軍申宣爲兗州刺史丁酉征南大將軍
檀道濟破索虜於東壽張二月乙卯以平北司
馬韋朗爲青州刺史戊午以尚書右僕射江夷
爲湘州刺史辛酉滑臺爲索虜所陷癸酉征南
大將軍檀道濟引軍還丁丑青州刺史蕭思話
棄城走以太子右衛率劉遵考爲南兗州刺史
三月甲申車駕於延賢堂聽訟戊申詔曰自頃
軍役殷興國用增廣資儲不給百度尚繁宜存

簡約以應事實內外可通共詳思務令節儉夏
四月甲寅以衡陽王師阮萬齡爲湘州刺史乙
卯以後軍參軍徐遵之爲兗州刺史六月乙丑
大赦天下己卯割江南及揚州晉陵郡屬南徐
州江北屬兗州以徐州刺史竟陵王義宣爲南
兗州刺史司徒司馬吉翰爲徐州刺史閏月庚
子詔曰自頃農桑惰業遊食者衆荒萊不闢督
課無聞一時水旱便有罄匱不深存務本豐給
靡因郡守賦政方畿縣宰親民之主宜思獎訓

導以良規咸使肆力地無遺利耕蠶樹藝各盡其力若有力田殊衆歲竟條名列上揚州旱乙巳遣侍御史省獄訟申調役丙午以左軍諮議參軍劉道產爲雍州刺史秋八月甲辰臨川王義慶解尚書僕射丁未割豫州秦郡屬南兗州冬十二月罷湘州還并荊州

九年春三月庚戌衛將軍王弘進位太保加中書監丁巳征南大將軍江州刺史檀道濟進位司空夏四月乙亥以護軍將軍殷穆爲特進右

光祿大夫建昌縣公劉彥之爲護軍將軍五月壬申中書監錄尚書事衛將軍揚州刺史王弘薨六月甲戌以左軍諮議參軍申宣爲青州刺史分青州置冀州戊寅司徒南徐州刺史彭城王義康改領揚州刺史己卯以司徒參軍崔誼爲冀州刺史壬午以吐谷渾慕容延爲東平將軍吐谷渾拾虔爲平北將軍吐渾輝伐爲鎮軍將軍癸未詔曰益梁交廣境域幽遐治宜物情或多偏攤可更遣大使巡求民瘼置積射彊弩

將軍官乙未以征西將軍沙州刺史吐谷渾慕容瓚為征西大將軍西秦河二州刺史隴西王北秦州刺史氏楊難當加號征西將軍壬寅以撫軍將軍荊州刺史江夏王義恭為征北將軍開府儀同三司南兗州刺史前將軍臨川王義慶為平西將軍荊州刺史南兗州刺史竟陵王義宣為中書監中軍將軍征虜將軍衡陽王義季為南徐州刺史秋七月戊辰以尚書王仲德為鎮北將軍徐州刺史庚午以領軍將軍殷景

仁為尚書僕射太子詹事劉湛為領軍將軍壬申河南國西河王遣使獻方物九月妖賊趙廣寇益州陷沒郡縣州府討平之冬十一月壬子以少府甄法崇為益州刺史癸丑於廣州立宋康郡十二月甲戌以右軍參軍李秀之為交州刺史庚寅立第五皇子紹為廬陵王江夏王義恭子朗為南豐縣王

十年春正月甲寅竟陵王義宣改封南譙王鎮北將軍徐州刺史王仲德加領兗州刺史淮南

太守段宏爲青州刺史己未大赦天下孤老六
疾不能自存者人賜穀五斛後將軍豫州刺史
長沙王義欣進號鎮軍將軍夏四月戊戌青州
刺史段宏加冀州刺史封陽縣侯蕭思話爲梁
南秦二州刺史五月林邑王遣使獻方物六月
乙亥以前青州刺史韋朗爲廣州刺史閻婆州
訶羅單國遣使獻方物秋七月戊戌曲赦益梁
秦三州於益州立宋寧宋興二郡八月丁丑於
青州立太原郡辛巳護軍將軍到彥之卒冬十
一月氏楊難當寇漢川丁未梁州刺史甄法護
棄城走難當據有梁州

十一年春正月亡命馬大玄羣黨數百人寇秦
梁州郡討平之二月癸酉以交阯太守李耽之
爲交州刺史夏四月梁秦二州刺史蕭思話破
氏楊難當梁州平五月丁卯曲赦梁南秦二州
劍閣北戊寅以大沮渠茂虔爲征西大將軍涼
州刺史是月京邑大水六月丁未省魏郡是歲
林邑國扶南國訶羅單國遣使獻方物

十二年春正月辛酉大赦天下辛未車駕親祠
南郊癸酉封黃龍國主馮弘爲燕王夏四月乙
酉尚書僕射殷景仁加中護軍丙辰詔曰周宗
以寧寔由多士漢室之隆亦資得人朕寐寤樂
賢爲日已久而俊哲難階明揚莫效用令遺才
在野管庫虛朝永懷前載慙德深矣夫舉爾所
知宣尼之篤訓貢士任官先代之成准便可宣
敕內外各有薦舉當依方銓引以觀厥用是夜
京邑地震六月丹陽淮南吳興義興大水京邑

乘船已酉以徐豫南兗三州會稽宣城二郡米
數百萬斛賜五郡遭水民是月斷酒師子國遣
使獻方物秋七月乙酉闍婆娑達國扶南國竝
遣使獻方物八月壬申於益州立南晉壽新巴
西三郡乙亥原遭水郡諸適負九月蜀郡賊張
尋爲寇冬十一月以右軍行參軍苟道覆爲交
州刺史

十三年春正月癸丑上有疾不朝會三月己未
司空江州刺史檀道濟有罪伏誅庚申大赦天

下以中軍將軍南譙王義宣為鎮南將軍江州
 刺史夏五月戊辰鎮北將軍徐兗二州刺史王
 仲德進號鎮北大將軍庚辰以征北司馬王方
 俳為兗州刺史六月高麗國武都王遣使獻方
 物秋七月己未零陵王太妃薨追崇為晉皇后
 葬以晉禮八月庚寅尚書僕射中護軍殷景仁
 改為護軍將軍九月癸丑立第二皇子濬為始
 興王第三皇子諱為武陵王

十四年春正月辛卯車駕親祠南郊大赦天下

文武賜位一等孤老六疾不能自存者人賜穀
 五斛二月壬子以步兵校尉劉道真為梁南秦
 二州刺史夏四月丁未以輔國將軍周籍之為
 益州刺史秋八月戊午以尚書金部郎中徐森
 之為交州刺史冬十二月辛酉停賀雪河南國
 西河王訶羅單國竝遣使獻方物
 十五年春二月丁未以平東將軍吐谷渾慕容
 延為鎮西將軍秦河二州刺史夏四月甲辰燕
 王年遣使獻方物立皇太子妃殷氏賜王公以

下各有差己巳以倭國王珍爲安東將軍五月
己丑特進右光祿大夫殷穆卒辛卯鎮北大將
軍徐州刺史王仲德卒壬辰以右衛將軍劉遵
考爲徐兗二州刺史秋七月辛未地震甲戌以
陳南頓二郡太守徐循爲寧州刺史八月辛丑
以左衛將軍趙伯符爲徐兗二州刺史甲寅以
始興內史陸徽爲廣州刺史丁巳以兗州刺史
王方排爲青冀二州刺史是歲武都王河南國
高麗國倭國扶南國林邑國竝遣使獻方物

十六年春正月戊寅車駕於北郊閱武庚寅司
徒錄尚書事揚州刺史彭城王義康進位大將
軍領司徒餘如故征北將軍開府儀同三司南
兗州刺史江夏王義恭進位司空刺史如故特
進左光祿大夫王敬弘開府儀同三司癸巳復
分荊州置湘州二月己亥以南徐州刺史衡陽
王義季爲安西將軍荊州刺史丁未以始興王
濬爲湘州刺史癸亥割梁州之巴西梓潼南宕
梁南漢中南秦州之南安懷寧凡六郡屬益州

分長沙江夏郡立巴陵郡屬湘州夏四月丁巳
 以鎮南將軍江州刺史南譙王義宣為征北將
 軍南徐州刺史平西將軍臨川王義慶為衛將
 軍江州刺史六月己酉隴西吐谷渾慕容延改
 封河南王癸丑以吐谷渾拾寅為平西將軍吐
 谷渾繁暉為撫軍將軍秋八月庚子立第四皇
 子鑠為南平王閏月乙未鎮軍將軍豫州刺史
 長沙王義欣薨戊戌復分豫州之淮南為南豫
 州癸卯以左衛將軍劉遵考為豫州刺史戊申

以湘州刺史始興王濬為南豫州刺史武陵王
諱為湘州刺史冬十二月乙亥皇太子冠大赦
 天下是歲武都王河南王林邑國高麗國並遣
 使獻方物

十七年夏四月戊午朔日有蝕之五月癸巳領
 軍將軍劉湛母憂去職秋七月壬寅以征虜諮
 議參軍杜驥為青州刺史壬子皇后袁氏崩八
 月徐兗青冀四州大水己未遣使檢行賑卹九
 月壬子葬元皇后於長寧陵冬十月戊午前丹

陽尹劉湛有罪及同黨伏誅大赦天下文武賜
 爵一級以大將軍領司徒錄尚書揚州刺史彭
 城王義康為江州刺史大將軍如故以司空南
 兖州刺史江夏王義恭為司徒錄尚書事戊寅
 衛將軍臨川王義慶以本號為南兖州刺史尚
 書僕射護軍將軍殷景仁為揚州刺史僕射如
 故十一月丙戌以尚書劉義融為領軍將軍祕
 書監徐湛之為中護軍丁亥詔曰前所給揚南
 徐二州百姓田糶種子兖兩豫青徐諸州比年

所寬租穀應督入者悉除半今半有不收處都
 原之凡諸逋債優量申減又州郡估稅所在市
 調多有煩刻山澤之利猶或禁斷役召之品遂
 及稚弱諸如此比傷治害民自今咸依法令務
 盡優允如有不便即依事別言不得苟趣一時
 以乖隱卹之旨主者明加宣下稱朕意焉癸丑
 尚書僕射揚州刺史殷景仁卒十二月癸亥以
 光祿大夫王琳為尚書僕射戊辰以南豫州刺
 史始興王濬為揚州刺史湘州刺史武陵王

萬曆二十二年刊

宋書紀卷五

十八

爲南豫州刺史南平王鐸爲湘州刺史是歲武
都王河南王百濟國遣使獻方物

十八年春二月乙卯以豫章太守庾登之爲江
州刺史夏五月壬申衛將軍南兖州刺史臨川
王義慶征北將軍南徐州刺史南譙王義宣竝
開府儀同三司癸巳於交州置宋熙郡是月沔
水泛溢六月戊辰遣使巡行賑贍辛未領軍將
軍劉義融卒秋七月戊戌以徐兗二州刺史趙
伯符爲領軍將軍冬十月辛亥以巴東建平二

郡太守臧質爲徐兗二州刺史乙卯省南徐州
之南燕濮陽南廣平郡十一月戊子尚書僕射
王琳卒己亥以丹陽尹孟顓爲尚書僕射氏楊
難當又寇漢川十二月癸亥遣龍驤將軍裴方
明與梁秦二州刺史劉真道討之十二月晉寧
太守襄松子反叛寧州刺史徐循討平之是歲
肅特國高麗國蘇靡黎國林邑國竝遣使獻方
物

十九年正月乙巳詔曰夫所因者本聖哲之遠

教本立化成敦學之爲貴故詔以三德崇以四
術用能納諸義方致之軌度盛王祖世咸必由
之永初受命憲章弘遠將陶鈞庶品混一殊風
有詔典司大啓庠序而頻邁屯夷未及脩建永
瞻前猷思敷鴻烈今方隅乂寧戎夏慕嚮廣訓
胄子實維時務便可式遵成規闡揚景業夏四
月甲戌以久疾愈始奉初祠大赦天下五月庚
寅梁秦二州刺史劉真道龍驤將軍裴方明破
氏楊難當仇池平閏月京師雨水丁巳遣使巡

行賑卹六月壬午以大沮渠无諱爲征西大將
軍涼州刺史秋七月以梁秦二州刺史劉真道
爲雍州刺史龍驤將軍裴方明爲梁南秦二州
刺史甲戌晦日有蝕之冬十月甲申芮芮國遣
使獻方物巳亥以晉寧太守周萬歲爲寧州刺
史十二月丙申詔曰胄子始集學業方興自微
言泯絕逝將干祀感事思人意有慨然奉聖之
胤可速議繼襲於先廟地特爲營造依舊給祠
直令四時饗祀闕里往經寇亂黷校殘毀并下

魯郡修復學舍採召生徒昔之賢哲及一介之善猶或衛其丘壟禁其芻牧况尼父德表生民功被百代而墳塋荒蕪荆棘弗翦可蠲墓側數戶以掌灑掃魯郡上民孔景等五戶居近孔子墓側蠲其課役供給灑掃并種松柏六百株是歲婆皇國遣使獻方物

二十年春正月於臺城東西開萬春千秋二門二月甲戌江州刺史庾登之爲中護軍庚申以廬陵王紹爲江州刺史仇池爲索虜所沒甲申車駕於白下閱武三月辛亥安西將軍荊州刺史衡陽王義季進號征西大將軍以巴西梓潼二郡太守申坦爲梁南秦二州刺史夏四月甲午立第六皇子誕爲廣陵王五月癸丑中護軍庾登之卒秋七月癸丑以楊文德爲征西將軍北秦州刺史封武都王辛酉以南蠻校尉蕭思話爲雍州刺史甲子前雍州刺史劉真道梁南秦二州刺史裴方明有罪下獄死八月癸未以廷尉陶愍祖爲廣州刺史冬十二月庚午以始

興內史檀和之爲交州刺史壬午詔曰國以民爲本民以食爲天故一夫輟稼饑者必及倉廩旣實禮節以興自頃在所貧罄家無宿積賦役暫偏則人懷愁墊歲或不稔而病之比室誠由政德弗孚以臻斯弊抑亦耕桑未廣地利多遺宰守微化導之方萌庶忘勤分之義永言弘濟明發載懷雖制令亟下終莫懲勸而坐望滋殖庸可致乎有司其班宣舊條務盡敦課遊食之徒咸令附業考覈勤惰行其誅賞觀察能殿嚴

加黜陟古者躬耕帝籍敬供粢盛仰瞻前王思遵令典便可量處千畝考卜元辰朕當親率百辟致禮郊甸庶幾誠素將被斯民是歲河西國高麗國百濟國倭國竝遣使獻方物是歲諸州郡水旱傷稼民大饑遣使開倉賑卹給賜糧種二十一年春正月己亥南徐南豫州揚州之浙江西竝禁酒大赦天下諸逋債在十九年以前一切原除去歲失收者疇量申減尤弊之處遣使就郡縣隨宜賑卹凡欲附農而種糧匱乏者

竝加給貸營千畝諸統司役人賜布各有差戊
午衛將軍臨川王義慶薨辛酉以太子詹事劉
義宗爲南兖州刺史二月庚午以領軍將軍趙
伯符爲豫州刺史己丑司徒錄尚書事江夏王
義恭進位太尉領司徒庚寅以右衛將軍沈演
之爲中領軍辛卯立第七皇子宏爲建平王甲
午以廣陵王誕爲南兖州刺史夏四月晉陵延
陵民徐耕以米千斛助卹饑民五月壬戌以尚
書何尚之爲中護軍諮議參軍劉道錫爲廣州

刺史六月連雨水丁亥詔曰霖雨彌日水潦爲
患百姓積儉易致乏匱二縣官長及營署部司
各隨統檢實給其柴米必使周悉秋七月丁酉
揚州刺史始興王濬加中軍將軍南豫州刺史
武陵王贊加撫軍將軍乙巳詔曰比年穀稼傷
損淫亢成災亦由播殖之宜尚有未盡南徐兖
豫及揚州浙江西屬郡自今悉督種麥以助闕
乏速運彭城下邳郡見種委刺史貸給徐豫土
多稻田而民間專務陸作可符二鎮履行舊陂

相率修立并課墾闢使及來年凡諸州郡皆令
盡勤地利勸導播殖蠶桑麻紵各盡其方不得
但奉行公文而已八月戊辰征西大將軍荊州
刺史衡陽王義季爲征北大將軍開府儀同三
司南兗州刺史征北將軍徐州刺史南譙王義
宣爲車騎將軍荊州刺史南兗州刺史廣陵王
誕爲南徐州刺史九月甲辰以大沮渠安周爲
征西將軍涼州刺史封河西王冬十月己卯以
左軍將軍徐瓊爲兗州刺史大將軍參軍申恬
爲冀州刺史

二十二年春正月辛卯朔改用御史中丞何承
天元嘉新曆壬辰撫軍將軍南豫州刺史武陵
王諱改爲雍州刺史湘州刺史南平王鑠爲南
豫州刺史二月辛巳以侍中王僧朗爲湘州刺
史甲戌立第八皇子禕爲東海王第九皇子昶
爲義陽王夏六月辛亥以南豫州刺史南平王
鑠爲豫州刺史秋七月己未以尚書僕射孟顛
爲尚書左僕射中護軍何尚之爲尚書右僕射

雍州刺史武陵王 諱討緣沔蠻移一萬四千餘
口於京師乙酉征北大將軍南兖州刺史衡陽
王義季改爲徐州刺史九月乙未開酒禁冬十
月起湖熟廢田千頃十二月乙未太子詹事范
曄謀反及黨與皆伏誅丁酉免大將軍彭城王
義康爲庶人庚戌以前豫州刺史趙伯符爲護
軍將軍

二十三年春正月丁巳以長沙內史陸徽爲益
州刺史庚申尚書左僕射孟顓去職遷漢州流
民於沔次二月癸卯以左衛將軍劉義賓爲南
兖州刺史三月索虜寇兖豫青冀刺史申恬破
之夏四月丁未大赦天下六月癸未朔日有蝕
之交州刺史檀和之伐林邑國尅之秋七月辛
未以散騎常侍杜坦爲青州刺史八月癸卯揭
陽赭賊攻建安郡燔燒城府九月己卯車駕幸
國子學策試諸生答問凡五十九人冬十月戊
子詔曰庠序興立累載曾子肄業有成近親策
試觀濟濟之美緬想洙泗永懷在昔諸生答問

多可採覽教授之官竝宜沾賚賜帛各有差十
二月丁酉以龍驤司馬蕭景憲爲交州刺史是
歲大有年築北堤立玄武湖築景陽山於華林
園

二十四年春正月甲戌大赦天下文武賜位一
等繫囚降宥諸逋負寬減各有差孤老六疾不
能自存人賜穀五斛蠲建康秣陵二縣今年田
租之半三月壬申護軍將軍趙伯符遷職夏五
月甲戌青州刺史杜坦加冀州刺史六月京邑

疫癘丙戌使郡縣及營署部司普加覆行給以
醫藥是月以貨貴制大錢一當兩秋七月乙卯
以林邑所獲金銀寶物班賚各有差八月乙未
征北大將軍徐州刺史衡陽王義季薨癸卯以
南兖州刺史劉義賓爲徐州刺史九月己未以
中領軍沈演之爲領軍將軍辛未以太子詹事
徐湛之爲南兖州刺史冬十月壬午豫章胡誕
世反殺太守桓隆之前交州刺史檀和之南還
至豫章因討平之壬辰以建平王宏爲中護軍

十一月甲寅立第十皇子渾為汝陰王

二十五年春正月戊辰詔曰比者冰雪經旬薪

粒貴踊貧弊之室多有窘罄可檢行京邑二縣

及營署賜以柴米二月庚寅詔曰安不忘危經

世之所同治兵教戰有國之恒典故服訓明恥

然後少長知禁頊戎政雖脩而號令未審今宣

武場始成便可尅日大習衆軍當因校獵隸武

講事閏月己酉大蒐于宣武場三月庚辰車駕

校獵夏四月乙巳新作閭闔廣莫二門改先廣

莫門曰承明開陽曰津陽乙卯以撫軍將軍雍

州刺史武陵王諱為安北將軍徐州刺史癸亥

以右衛將軍蕭思話為雍州刺史五月己卯罷

大錢當兩六月庚戌零陵王司馬元瑜薨庚戌

安北將軍徐州刺史武陵王諱加兗州刺史丙

寅車騎將軍荆州刺中南譙王義宣進位司空

秋七月壬午左光祿大夫王敬弘薨八月己酉

以撫軍參軍劉秀之為梁南秦二州刺史甲子

立第十一皇子諱為淮陽王九月辛未以尚書

右僕射何尚之爲尚書左僕射領軍將軍沈演之遷職吳興太守劉遵考爲領軍將軍

二十六年春正月辛巳車駕親祠南郊二月己亥車駕陸道幸丹徒謁京陵三月丁巳詔曰朕違北京二十餘載雖云密邇瞻榮莫從今因四表無塵時和歲稔復獲拜奉舊塋展固極之思饗謙故老申追遠之懷固以義兼於桑梓情加於過沛永言慷慨感慰寔深宜率宣仁惠覃被羣士其大赦天下復丹徒縣僑舊今歲租布之

半行所經縣蠲田租之半二千石官長竝勤勞王務宜有沾錫登城三戰及大將戰亡墜沒之家老病單弱者普加贍卹遣使巡行百姓問所疾苦孤老鰥寡六疾不能自存者人賜穀五斛遣使祭晉故司空忠肅公何无忌之墓乙丑申南北沛下邳三郡復又詔曰京口肇祥自古著符近代衿帶江山表裏華甸經塗四達利盡淮海城邑高明土風淳壹苞總形勝實唯名都故能光宅靈心克昌帝業頃年岳牧遷回軍民徙

散廬里廬宇不逮往日皇基舊鄉地蕪蕃重宜
令殷阜式崇形望可募諸州樂移者數千家給
以田宅并蠲復五月丙寅詔曰吾生於此城及
盧循肆亂害流茲境先帝以桑梓根本寔同休
戚復以蒙稚猥同艱難情義繾綣夷險兼備舊
物遺蹤猶存心目歲月不居逝踰三紀時人故
老與運零落眷惟既往倍深感歎可搜訪于時
士庶文武今尚存者具以名聞人身已亡而子
孫見在優量賜賚之車駕水路發丹徒壬午至

京師丙戌婆皇國壬辰婆達國竝遣使獻方物
秋七月辛未以江州刺史廬陵王紹爲南徐州
刺史廣陵王誕爲雍州刺史八月己酉以中護
軍建平王宏爲江州刺史癸丑以南豐王朗爲
湘州刺史冬十月廣陵王誕改封隨郡王甲辰
以中軍將軍揚州刺史始興王濬爲征北將軍
開府儀同三司南徐兗二州刺史南徐州刺史
廬陵王紹爲揚州刺史

二十七年春正月辛未制交寧二州假板郡縣

俸祿聽依臺除辛卯百濟國遣使獻方物二月
辛丑右將軍豫州刺史南平王鑠進號平西將
軍辛巳索虜寇汝南諸郡陳頓二郡太守鄭琨
汝陽潁川二郡太守郭道隱委守走索虜攻懸
瓠城行汝南郡事陳憲拒之以軍興減百官俸
三分之一三月乙丑淮南太守諸葛闡求減俸
祿同內百官於是州及郡縣丞尉竝悉同減戊
寅罷國子學乙酉以新除吏部尚書蕭思話爲
護軍將軍夏四月壬子安北將軍徐兗二州刺

史武陵王贊降號鎮軍將軍六月丁酉侍中蕭
斌爲青冀二州刺史秋七月庚午遣寧朔將軍
王玄謨北伐太尉江夏王義恭出次彭城總統
諸軍乙亥索虜碣磔戍委城走冬閏月癸亥玄
謨攻滑臺不克爲虜所敗退還碣磔辛未雍州
刺史隨王誕遣軍攻弘農城克之丙戌又克關
城十一月戊子索虜陷鄒山魯陽平二郡太守
崔邪利沒甲午隨王誕所遣軍又攻陝城克之
癸卯左軍將軍劉康祖於壽陽尉武成與虜戰

敗見殺丁未大赦天下十二月戊午內外戒嚴
乙丑冗從僕射胡崇之太子積弩將軍臧澄之
建威將軍毛熙祚於盱眙與虜戰敗竝見殺庚
午虜僞主率大衆至瓜步壬午內外戒嚴
二十八年春正月丙戌朔以寇逼不朝會丁亥
索虜自瓜步退走丁酉攻圍盱眙城是月寧朔
將軍王玄謨自碻礮退還歷下二月丙辰索虜
自盱眙奔走癸酉詔曰獫狁孔熾難及數州睽
言念之寤寐興悼凶羯疾挫逆跡遠奔彫傷之

夷宜時振理凡遭寇賊郡縣令還復居業封屍
掩骼賑贖流東作方始務盡勸課貸給之宜
事從優厚流寓江淮者竝聽即屬并蠲復稅
調甲戌太尉領司徒江夏王義恭降爲驃騎將
軍開府儀同三司辛巳鎮軍將軍徐兖二州刺
史武陵王諱降號北中郎將壬午車駕幸瓜步
是日解嚴三月乙酉車駕還宮壬辰征北將軍
始興王濬解南兖州庚子以輔國將軍臧質爲
雍州刺史戊申徐州刺史武陵王諱爲南兖州

刺史甲寅護軍將軍蕭思話爲撫軍將軍徐充
二州刺史夏四月癸酉婆達國遣使獻方物索
虜僞寧南將軍魯爽中書郎魯秀歸順戊寅以
爽爲司州刺史五月乙酉亡命司馬順則自號
齊王據梁鄒城丁巳婆皇國戊戌河南王竝遣
使獻方物己巳驃騎將軍江夏王義恭領南兗
州刺史戊申以尚書左僕射何尚之爲尚書令
太子詹事徐湛之爲尚書僕射護軍將軍壬子
以後將軍隨王誕爲安南將軍廣州刺史六月

壬戌以北中郎將武陵王諱爲江州刺史以振
武將軍秦郡太守劉興祖爲青冀州刺史秋
七月甲辰安東將軍倭王倭濟進號安東大將
軍八月癸亥梁鄒平斬司馬順則冬十月癸亥
高麗國遣使獻方物十一月壬寅曲赦二交徐
豫青冀六州是冬徙彭城流民於瓜步淮西流
民於姑熟合萬許家

二十九年春正月甲午詔曰經寇六州居業未
能仍值災澇饑困存臻可速符諸鎮優量救卹

今農事行興務盡地利若須田種隨宜給之二
月庚申虜帥拓跋燾死庚午立第十二皇子休
仁爲建安王夏四月戊午訶羅單國遣使獻方
物以驃騎參軍張永爲冀州刺史五月甲午罷
湘州并荊州以始興臨賀始安三郡屬廣州丙
申詔曰惡稔身滅戎醜常數虐虜窮凶著於自
昔未勞資斧已伏天誅子孫相殘親黨離貳關
洛僞帥竝懷內款河朔遺民注誠請効拯溺蕩
穢今其會也可符驃騎司空二府各部分所統

東西應接歸義建績者隨勞酬獎是月京邑雨
水六月巳酉遣部司巡行賜樵米給船撫軍將
軍蕭思話率衆北伐以征北從事中郎劉瑀爲
益州刺史秋七月壬辰汝陰王渾改封武昌王
淮陽王諱改封湘東王丁酉省大司農太子僕
廷尉監官八月丁卯蕭思話攻碣磔不拔退還
九月丁亥以平西將軍吐谷渾拾寅爲安西將
軍秦河二州刺史巳丑撫軍將軍徐交二州刺
史蕭思話加冀州刺史交州如故冬十月癸亥

司州刺史魯爽攻虎牢不拔退還十一月壬寅揚州刺史廬陵王紹薨十二月辛未以驃騎將軍南兖州刺史江夏王義恭爲大將軍南徐州刺史錄尚書事如故

三十年春正月戊寅以司空荊州刺史南譙王義宣爲司徒中軍將軍揚州刺史以南兖州并南徐州庚辰以領軍將軍劉遵考爲平西將軍豫州刺史壬午以征北將軍南徐州刺史始興王濬爲衛將軍荊州刺史戊子江州刺史武陵

王諱統衆軍伐西陽蠻癸巳以豫州刺史南平王鑠爲撫軍將軍領軍將軍青徐州饑二月壬子遣運部賑卹甲子上崩于含章殿時年四十七謚曰景皇帝廟曰中宗三月癸巳葬長寧陵世祖踐祚追改謚及廟號

史臣曰太祖幼年特秀顧無保傅之嚴而天授和敏之姿自稟君人之德及正位南面歷年長久綱維備舉條禁明密罰有恒科爵無濫品故能內清外晏四海謐如也昔漢氏東京常稱建

萬曆卅二年刊
武永平故事自茲厥後亦每以元嘉爲言斯固
盛矣授將遣帥垂分闔之命才謝光武而遙制
兵略至於攻日戰時莫不仰聽成旨雖覆師喪
旅將非韓白而延寇蹙境抑此之由及至言漏
衾衽難結凶豎雖禍生非慮蓋亦有以而然也
嗚呼哀哉

同日校正四字 禎識

本紀第五

宋書五



